

কল্পনা ।

শ্রীরবীন্দ্রনাথ ঠাকুর কর্তৃক
প্রণীত ।

কলিকাতা

আদি ব্রাহ্মসমাজ যন্ত্রে

শ্রীদেবেন্দ্রনাথ ভট্টাচার্য্যের দ্বারা মুদ্রিত ও
প্রকাশিত ।

৫৫নং অপার চিংপুর রোড ।

২৩ বৈশাখ, ১৩০৭ সাল ।

মূল্য এক টাকা ।

উৎসর্গ।

শ্রীযুক্ত শ্রীশচন্দ্র মজুমদার

স্বহৃৎকরকমলে ।

বৈশাখ ১৩০৭ ।

সূচিপত্র ।


বিষয় ।			পৃষ্ঠা ।
ছঃসময়	...	...	১
বর্ষামঙ্গল	...	...	৩
চৌর-পঞ্চাশিকা	...	...	৬
স্বপ্ন	...	...	৯
মদনভাস্কর পূর্বে	...	...	১২
মদনভাস্কর পর	...	...	১৫
মার্জনা	...	...	১৬
চৈত্ররজনী	...	...	১৮
স্পর্ধা	...	...	১৯
পিয়াসী	...	...	২০
পসারিণী	...	...	২৩
দ্রষ্ট লগ্ন	...	...	২৫
প্রণয় প্রস্ন	...	...	২৭
আশা	...	...	৩০
বঙ্গলক্ষ্মী	...	...	৩১
শরৎ	...	...	৩৩
মাতার আহ্বান	...	...	৩৬
ভিক্ষায়াং নৈব নৈবচ	...	...	৩৮
হৃতভাগ্যের গান	...	...	৩৯

বিষয়			পৃষ্ঠা ।
জুতা আবিষ্কার	...	...	৪৩
সে আমার জননী রে	...	...	৪৮
জগদীশচন্দ্র বসু	...	...	৫০
তিথারী	...	...	৫২
যাচনা	...	...	৫২
বিদায়	...	...	৫৩
নীলা	...	...	৫৬
নব বিরহ	...	...	৫৭
লজ্জিতা	...	...	৫৮
কাল্পনিক	...	...	৫৯
মানসপ্রতিমা	...	...	৬০
সংকোচ	...	...	৬১
প্রার্থী	...	...	৬২
সকরণা	...	...	৬৪
বিবাহ-মঙ্গল	...	...	৬৫
ভারতলক্ষ্মী	...	...	৬৬
প্রকাশ	...	...	৬৭
উন্নতি-লক্ষণ	...	...	৭১
অশেষ	...	...	৮০
বিদায় কাল	...	...	৮৫
বর্ষ শেষ	...	...	৮৭

বিষয় ।			পৃষ্ঠা ।
ঝড়ের দিনে	...	...	৯৫
অসময়	...	...	৯৮
বসন্ত	...	...	১০১
জগ্ন মন্দির	...	...	১০৪
বৈশাখ	...	...	১০৫
রাত্রি	...	...	১০৮
অনবচ্ছিন্ন আমি	...	...	১১১
জন্মদিনের গান	...	...	১১২
পূর্ণকাম	...	...	১১৩
প রণাম	...	...	১১৪

দুঃসময় ।

যদিও সন্ধ্যা আসিছে মন্দ মন্তরে
সব সঙ্গীত গেছে ইঙ্গিতে থামিয়া
যদিও সঙ্গী নাই অনন্ত অস্বপ্নে,
যদিও ক্লান্তি আসিছে অঙ্গে নামিয়া
মহা আশঙ্কা জপিছে মৌন অন্তরে,
দিক্ দিগন্ত অবগুণ্ঠনে ঢাকা,
তবু বিহঙ্গ, ওরে বিহঙ্গ মোর,
এখনি, অন্ধ, বন্ধ কোরোনা পাখা !



এ নহে মুখর বন-মন্দির গুঞ্জিত,
এ যে অজাগর-গবজে সাগর ফুলিছে ;
এ নহে কুঞ্জ কুন্দ-কুসুমরঞ্জিত,
ফেন-হিল্লোল কল-কল্লোলে হুলিছে ;
কোথারে সে তীর ফুল-পল্লব-পুঞ্জিত,
কোথারে সে নীড়, কোথা আশ্রয়-শাখা !
তবু বিহঙ্গ, ওরে বিহঙ্গ মোর,
এখনি অন্ধ, বন্ধ কোরোনা পাখা !

এখনো সম্মুখে রয়েছে সূচির শর্বরী,
 ঘুমায় অরুণ সূদূর অন্ত-অচলে ;
 বিশ্ব-জগৎ নিঃশ্বাসবায়ু সঞ্চরি
 স্তব্ধ আসনে গ্রহর গণিছে বিরলে ;
 সবে দেখা দিল অকূল তিমির সন্তরি
 দূর দিগন্তে ক্ষীণ শশাঙ্ক বাঁকা ;
 ওরে বিহঙ্গ, ওরে বিহঙ্গ মোর,
 এখনি, অন্ধ, বন্ধ কোরোনা পাখা !

উর্দ্ধ আকাশে তারাগুলি মেলি অঙ্গুলি
 ইঙ্গিত করি' তোমাপানে আছে চাহিয়া ,
 নিয়ে গভীর অধীর মরণ উচ্ছূলি
 শত তরঙ্গে তোমা পানে উঠে ধাইয়া ;
 বহু দূর তীরে কারা ডাকে বাধি অঞ্জলি
 এস এস সুরে করুণ মিনতি-মাথা ;
 ওরে বিহঙ্গ, ওরে বিহঙ্গ মোব,
 এখনি, অন্ধ, বন্ধ কোরোনা পাখা !

ওরে ভয় নাই, নাই স্নেহ-মোহবন্ধন,
 ওরে আশা নাই, আশা শুধু মিছে ছলনা !
 ওরে ভাষা নাই, নাই বৃথা বসে' ক্রন্দন,
 ওরে গৃহ নাই, নাই ফুল-শেজ-রচনা !

আছে শুধু পাখা, আছে মহা নভ-অঙ্গন
উষা-দিশাহারা নিবিড়-তিমির-আঁকা,
ওরে বিহঙ্গ, ওরে বিহঙ্গ মোর,
এখনি, অন্ধ, বন্ধ কোরো না পাখা !

১৩০৪ ।

বর্ষাগঙ্গল ।

ঐ আসে ঐ অতি ভৈরব হরষে
জলসিক্ত ক্ষিতিসৌরভ-রভসে
ঘনগোরবে নবযৌবনা বরষা
শ্রামগন্তীর সরসা !
শুকগজ্জনে নীল অরণ্য শিহরে
উতলা কলাপী কেকা-কলরবে বিহরে ;
নিখিল-চিত্ত-হরষা
ঘনগোরবে আসিছে মত্ত বরষা !

কোথা তোরা অগ্নি তরুণী পথিক-ললনা,
জনপদবধু তড়িৎ-চকিত-নয়না,
মালতীমালিনী কোথা প্রিয়-পরিচারিকা,
কোথা তোরা অভিসারিকা !

ঘনবনতলে এস ঘননীলবসনা,
 ললিত নৃত্যে বাজুক স্বর্ণরসনা,
 আনো বীণা মনোহারিকা !
 কোথা বিরহিনী, কোথা তোরা অভিসারিকা !

আন মৃদঙ্গ, মুরজ, মুরলী মধুরা,
 বাজাও শঙ্খ, ছলুরব কর বধুরা,
 এসেছে বরষা, ওগো নব অনুরাগিনী.
 ওগো প্রিয়স্বভাগিনী !
 কুঞ্জকুটীরে, অগ্নি ভাবাকুললোচনা,
 ভৃঞ্জ-পাতায় নব গীত কর রচনা
 মেঘমল্লার রাগিণী ।
 এসেছে বরষা ওগো নব অনুরাগিনী !

কেতকী কেশরে কেশপাশ কর সুরভী,
 স্নীগ কটিতটে গাথি লয়ে পর করবী,
 কদম্বরেণু বিছাইয়া দাও শয়নে,
 অঞ্জন আঁক নয়নে !
 তালে তালে ছুটি কঙ্কণ কনকনিয়া
 ভবন-শিথিরে নাচাও গণিয়া গণিয়া
 স্মিত-বিকশিত বয়নে ;
 কদম্বরেণু বিছাইয়া ফুল-শয়নে !

• নিক্সসজল মেঘকজ্জল দিবসে
 বিবশ প্রহর অচল অলস আবেশে ;
 শশীতারাহীনা অন্ধতামসী যামিনী ;
 কোথা তোরা পুরকামিনী !
 আজিকে ছয়ার রুদ্ধ ভবনে ভবনে
 জনহীন পথ কাঁদিছে ক্ষুদ্র পবনে,
 চমকে দীপ্ত দামিনী ;
 শূন্তশরনে কোথা জাগে পুরকামিনী !

যুধী-পরিমল আসিছে সজল সমীরে,
 ডাকিছে দাহুরী তমালকুঞ্জ-তিমিরে,
 জাগো সহচরী আজিকার নিশি ভুলোনা,
 নীপশাখে বাঁধ ঝুলনা !
 কুমুম-পরাগ ঝরিবে ঝলকে ঝলকে
 অধরে অধরে মিলন অলকে অলকে,
 কোথা পুলকের তুলনা !
 নীপশাখে সখি ফুলডোরে বাঁধ ঝুলনা !

এসেছে বরষা, এসেছে নবীনা বরষা,
 গগন ভরিয়া এসেছে ভুবন-ভরসা,
 ছলিছে পবনে সনসন বন-বীথিকা !
 শ্রীতমস তরুণতিকা !

শতেকযুগের কবিদলে মিলি আকাশে
 ধ্বনিয়া তুলিছে মন্তমদির বাতাসে
 শতেক যুগের গীতিকা !
 শত শত গীত-মুথরিত বন-বীথিকা !

১৩০৪ ।

চোর-পঞ্চাশিকা ।

ওগো সুন্দর চোর,
 বিজ্ঞা তোমার কোন্ সন্ধ্যার
 কনক চাঁপার ডোর !
 কত বসন্ত চলি গেছে হায়,
 কত কবি আজি কত গান গায়,
 কোথা রাজবালা চির শয্যায়
 ওগো সুন্দর চোর
 কোনো গানে আর ভাঙ্গেনা যে তার
 অনন্ত ঘুম ঘোর ।

চোর পঞ্চাশিকা ।

৭

ওগো সুন্দর চোর
কত কাল হল কবে সে প্রভাতে
তব প্রেমনিশি ভোর !
কবে নিবে গেছে নাহি তাহা লিখা
তোমার বাসরে দীপানল-শিখা,
খসিয়া পড়েছে সোহাগ-লতিকা,
ওগো সুন্দর চোর
শিথিল হয়েছে নবীন প্রেমের
বাহুপাশ সুকঠোর ।

তবু সুন্দর চোর
মৃত্যু হারায় কেঁদে কেঁদে যুগে
পঞ্চাশ শ্লোক তোর !
পঞ্চাশবার ফিরিয়া ফিরিয়া
বিদ্যার নাম ঘিরিয়া ঘিরিয়া
তীব্র ব্যথায় মর্ম্ম চিরিয়া
ওগো সুন্দর চোর
যুগে যুগে তারা কাঁদিয়া মরিছে
মুঢ় আবেগে ভোর ।

ওগো সুন্দর চোর,
 অবোধ তাহারা বধির তাহারা
 অন্ধ তাহারা ঘোর !
 দেখেনা শোনেনা কে আসে কে যায়,
 জানে না কিছুই কারে তারা চায়,
 শুধু এক নাম এক সুরে গায়
 ওগো সুন্দর চোর—
 না জেনে না বুকে ব্যর্থ ব্যথার
 ফেলিছে নয়ন লোর ।

ওগো সুন্দর চোর
 এক সুরে বাঁধা পঞ্চাশ গাথা
 শুনে মনে হয় মোর—
 রাজভবনের গোপনে পালিত,
 রাজ বালিকার সোহাগে লালিত,
 ভব বুকে বসি শিখেছিল গীত
 ওগো সুন্দর চোর
 পোষা শুকসারী মধুর কণ্ঠ
 যেন পঞ্চাশ জোড় !

ওগো সুন্দর চোর
তোমারি রচিত সোনার ছন্দ-
পিঞ্জরে তারা ভোর !
দেখিতে পায় না কিছু চারিধারে,
গুধু চির নিশি গাহে বারে বারে
তোমাদের চির শয়ন ছয়া-
ওগো সুন্দর চোর—
আজি তোমাদের ছুজনের চোখে
অনন্ত ঘুমঘোর ।

১৩০৪ ।

স্বপ্ন ।

দূরে বহুদূরে
স্বপ্নলোকে উজ্জয়িনী পুরে
খুঁজিতে গেছি কবে শিপ্রানদী পারে
মোর পূর্ব জনমের প্রথমা প্রিয়ারে ।
মুখে তাব লোধরেনু, লীলাপদ্ম হাতে,
কর্ণমূলে কুন্দকলি, কুরুবক মাথে,
তনু দেহে রক্তাশ্রয় নীবীবন্ধে বাধা,
চরণে নুপুরখানি বাজে আধা আধা ।

বসন্তের দিনে
ফিরেছিহু বহুদূরে পথ চিনে চিনে ।

মহাকাল মন্দিরের মাঝে
তখন গম্ভীর মল্লৈ সন্ধ্যারতি বাজে ।
জনশৃংখ পণ্যবীথি,—উদ্ধে যায় দেখা
অন্ধকার হর্ম্যাপরে সন্ধ্যারশ্মিরেখা ।

প্রিয়ার ভবন
বক্ষিম সঙ্কার্ণ পথে দুর্গম নির্জন ।
দ্বারে আঁকা শঙ্খ চক্র, তারি দুই ধারে
ভাট শিশু নীপতরু পুত্রস্নেহে বাড়ে ।

তোরণের স্বেতস্তম্ভ পরে
সিংহের গম্ভীর মূর্তি বসি দম্ভভরে !
প্রিয়ার কপোতগুলি ফিরে এল ঘরে,
ময়ুর নিদ্রায় মগ্ন স্বর্ণদণ্ড পরে ।

হেন কালে হাতে দীপশিখা
ধীরে ধীরে নামি এল মোর মালবিকা ।
দেখা দিল দ্বারপ্রান্তে সোপানের পবে
সন্ধ্যার লক্ষ্মীর মত সন্ধ্যাতারা করে ।
অঙ্গের কুঙ্কুমগন্ধ কেশ-ধূপবাস
ফেলিল সর্ব্বাঙ্গে মোর উতলা নিঃশ্বাস ।

প্রকাশিল অর্ধচ্যুত-বসন-অন্তরে
চন্দনের পত্রলেখা বাম পয়োধরে ।
দাঁড়াইল প্রতিমার প্রায়
নগর-গুঞ্জনক্ষান্ত নিস্তব্ধ সন্ধ্যায় ।

মোরে হেরি প্রিয়া
ধীরে ধীরে দীপখানি দ্বারে নামাইয়া
আইল সম্মুখে,—মোর হস্তে হস্ত রাখি
নীরবে সূখাল গুধু, সক্রুণ অঁখি,
“হে বন্ধু আছত ভাল ?”—মুখে তার চাহি
কথা বলিবারে গেছু — কথা আর নাহি !
সে ভাষা ভুলিয়া গেছি,— নাম দৌহাকার
তুজনে ভাবিছু কত,—মনে নাহি আর !
তুজনে ভাবিছু কত চাহি দৌহা পানে,
অন্ধোরে ঝরিল অশ্রু নিষ্পন্দ নয়ানে ।

তুজনে ভাবিছু কত দ্বারতরুতলে ।
নাহি জানি কখন কি ছলে
সুকোমল হাতখানি লুকাইল আসি
আঁমার দক্ষিণ করে,—কুলায়প্রত্যাশী
সন্ধ্যার পাখীর মত ; মুখখানি তার

নতবৃত্ত পদ্যসম এ বক্ষে আমার
 নমিয়া পড়িল ধীরে ;—ব্যাকুল উদাস
 নিঃশব্দে মিলিল আসি নিঃশ্বাসে নিঃশ্বাস ।

রজনীর অন্ধকার
 উজ্জয়িনী করি দিল লুপ্ত একাকার ।
 দীপ দ্বারপাশে
 কথনু নিবিয়া গেল ছুরন্ত বাতাসে ।
 শিপ্রানদীতীরে
 আরতি থামিয়া গেল শিবের মন্দিরে ।

১৩০৪ ।

মদনচন্ডোর পূর্বে ।
 একদা তুমি অঙ্গ ধরি ফিরিতে নব ভুবনে
 মরি মরি অনঙ্গ দেবতা !
 কুসুমরথে মকরকেতু উড়িত মধুপবনে
 পথিকবধু চরণে প্রণতা ।
 ছড়াত পথে আঁচল হতে আশোক চাঁপা করবা
 মিলিয়া যত তরুণ তরুণী,
 বকুলবনে পবন হ'ত স্রবার মত স্রবভী
 পরাণ হত অরুণ-বরণী ।

সন্ধ্যা হলে কুমারীদলে বিজন তব দেউলে
 জালায়ে দিত প্রদীপ যতনে,
 শূন্য হলে তোমার তুণ বাছিয়া ফুল-মুকুলে
 সায়ক তারা গড়িত গোপনে ।
 কিশোর কবি মুগ্ধ ছবি বসিয়া তব সোপানে
 বাজায়ে বীণা রচিত রাগিনী ।
 হরিণ সাথে হরিণী আসি চাহিত দীন নয়ানে,
 বাঘের সাথে আসিত বাঘিনী ।

হাসিয়া যবে তুলিতে ধনু প্রণয়ভীরু ষোড়শী
 চরণে ধরি করিত মিনতি ।
 পঞ্চশর গোপনে লয়ে কোতূহলে উলসি'
 পরখহলে খেলিত যুবতী ।
 শ্রামল তৃণ-শয়নতলে ছড়ায়ে মধু-মাধুরী
 ঘুমাতে তুমি গভীর আলসে,
 ভাঙাতে ঘুম লাজুক বধু করিত কত চাতুরী
 নুপুর ছুটি বাজাত লালসে ।

কাননপথে কলস লয়ে চলিত যবে নাগরী
 কুসুমশর মারিতে গোপনে,
 যমুনাকূলে মনের ভূলে ভাসায়ে দিবে গাগরী
 রহিত চাহি আকুল নয়নে ।

বাহিয়া তব কুম্ভমতরী সমুখে আসি হাসিতে .
 সরমে রালা উঠিত জাগিয়া,
 শাসন তরে বাঁকায়ে ভুরু নামিয়া জলরাশিতে
 মারিত জল হাসিয়া রাগিয়া ।

তেমনি আজো উদিছে বিধু মাতিছে মধুযামিনী
 মাধবীলতা মুদিছে মুকুলে ।
 বকুলতলে বাঁধিছে চুল একেলা বসি কামিনী
 মলয়ানিল-শিথিল-হুকুলে ।
 বিজুন নদীপুলিনে আজো ডাকিছে চখা চখীরে
 মাঝেতে বহে বিরহ-বাহিনী ।
 গোপন-ব্যথাকাতর বালা বিরলে ডাকি সখীরে
 কাঁদিয়া কহে কঙ্কণ কাহিনী ।

এস গো আজি অঙ্গ ধরি সঙ্গ করি সথারে
 বস্ত্রমালা জড়ায়ে অলকে,
 এস গোপনে মৃচ্ চরণে বাসরগৃহ-দ্বারে
 স্তিমিত-শিখা প্রদীপ আলোকে ।
 এস চতুর মধুর হাসি তড়িৎসম সহসা
 চকিত কর বধুরে হরষে,
 নবীন কর মানবধর ধরণী কর বিবশা
 দেবতা পদ-সরস-পরশে !

মদনভাস্কর পর ।

পঞ্চশরে দঙ্ক করে করেছে একি, সন্ন্যাসী,
 বিশ্বময় দিয়েছ তারে ছড়ায়ে !
 ব্যাকুলতর বেদনা তার বাতাসে উঠে নিঃশ্বাসি'
 অশ্রু তার আকাশে পড়ে গড়ায়ে ।
 ভরিয়া উঠে নিখিল ভব রতি-বিলাপ-সঙ্গীতে
 সকল দিক কাঁদিয়া উঠে আপনি ।
 মাধবীমাসে নিমেষ মাঝে না জানি কার ইঙ্গিতে
 শিহরি উঠি' মূরছি পড়ে অবনী ।

আজিকে তাই বুঝিতে নারি কিসের বাজে যন্ত্রণা
 হৃদয়-বীণা-যন্ত্রে মহা পুলকে,
 তরুণী বসি ভাবিয়া মরে কি দেয় তারে মন্ত্রণা
 মিলিয়া সবে ছ্যলোকে আর ভুলোকে !
 কি কথা উঠে মন্মথিয়া বকুল-তরু-পল্লবে,
 ভ্রমর উঠে গুঞ্জরিয়া কি ভাষা !
 উর্দ্ধমুখে স্বর্ঘ্যমুখী স্মরিছে কোন্ বসন্তে,
 নির্ঝরিণী বহিছে কোন্ পিপাসা !

বসন কার দেখিতে পাই জ্যোৎস্নালোকে লুপ্তিত
 নয়ন কার নীরব নীল গগনে !

বদন কার দেখিতে পাই কিরণে অবগুষ্ঠিত

চরণ কার কোমল তৃণ শয়নে !

পরশ কার পুষ্পবাসে পরাণমন উল্লাসি’

হৃদয়ে উঠে লতার মত ছড়ায়ে,

পঞ্চশরে ভস্ম করে করেছে এ কি, সন্ধ্যাসি,

বিশ্বময় দিয়েছ তারে ছড়ায়ে !

১৩০৪ ।

মার্জনা ।

ওগো প্রিয়তম, আমি তোমারে যে ভাল বেসেছি

মোরে দয়া করে কোরো মার্জনা, কোবো মার্জনা !

ভীক পাখীর মতন তব পিঞ্জরে এসেছি

ওগো তাই বলে দ্বার কোরোনা বন্ধ কোরোনা !

মোর বাহা'কিছু ছিল কিছুই পারিনি রাখিতে,

মোর উতলা হৃদয় তিলেক পারিনি ঢাকিতে,

সখা, তুমি রাখ তুমি ঢাক তুমি কর করুণা

ওগো আপনার গুণে অবলারে কোরো মার্জনা

কোরো মার্জনা !

ওগো প্রিয়তম, যদি নাহি পার ভালবাসিতে
 তবু ভালবাসা কোরো মার্জনা, কোরো মার্জনা !
 তব ছুটি আঁখিকোণ ভরি ছুটি কণা হাসিতে
 এই অসহায়্য পানে চেয়োনা বন্ধু চেয়োনা !
 আমি সম্বরি বাস ফিরে যাব দ্রুতচরণে,
 আমি চকিত সরমে লুকাব আঁধার মরণে,
 আমি ছ'হাতে ঢাকিব নগ্ন হৃদয়-বেদনা,
 ওগো প্রিয়তম তুমি অভাগীয়ে কোরো মার্জনা
 কোরো মার্জনা !

ওগো প্রিয়তম যদি চাহ মোরে ভাল বাসিয়া
 মোর সুখরাশি কোরো মার্জনা কোরো মার্জনা !
 ববে সোহাগের শ্রোতে যাব নিরুপায় ভাসিয়া
 তুমি দূর হতে বসি হেসোনাগো সখা হেসোনা !
 ববে রাণীর মতন বসিব রতন আসনে,
 ববে বাঁধিব তোমারে নিবিড় প্রণয় শাস্ত্রে,
 ববে দেবীর মতন পূর্যব তোমার বাসনা,
 ওগো তখন হে নাথ ! গরবীয়ে কোরো মার্জনা
 কোরো মার্জনা !

চৈত্ররজনী ।

আজি উদ্ভাস মধুনিশি, ওগো
 চৈত্র-নিশীথশশী !
 তুমি এ বিপুল ধরণীর পানে
 কি দেখিছ একা বসি
 চৈত্র নিশীথ শশী !

কত নদীতীরে, কত মন্দিরে,
 কত বাতায়নতলে,
 কত কানাকানি, মন-জানাজানি,
 সাধাসাধি কত ছলে !
 শাখা প্রশাখার, দ্বার জানালার
 আড়ালে আড়ালে পশি
 কত স্নেহস্থ কত কোতুক
 দেখিতেছ একা বসি ।
 চৈত্র-নিশীথ-শশী !

মোরে দেখ চাহি, কেহ কোথা নাহি,
 শূন্য ভবন ছাদে
 নৈশ পবন কাঁদে ।

তোমারি মতন একাকী আপনি
চাহিয়া রয়েছি বসি
চৈত্র-নিসীথ-শশি।

১৩০৪।

✓ স্বপ্ন।

সে আসি কহিল—“প্রিয়ে মুখ তুলে চাও!”
দৃষ্টিয়া তাহারে রুখিয়া কহিল “যাও”!
সখি ওলো সখি, সত্য করিয়া বলি,
তবু সে গেল না চলি!

দাঁড়াল সমুখে, কহিল তাহারে, সর’!
ধরিল হু’হাত, কহিল, আহা কি কর’!
সখি ওলো সখি মিছে না কহিব তোরে—
তবু ছাড়িল না মোরে!

শ্রুতিমূলে মুখ আনিল সে মিছিমিছি,—
নয়ন বাঁকায়ে কহিল তাহারে, ছি ছি!
সখি ওলো সখি কহিল শপথ করে
তবু সে গেল না সরে!

অধরে কপোল পরশ করিল তবু,
কাঁপিয়া কহিলু, এমন দেখিনি কভু !
সখি ওলো সখি এ কি তার বিবেচনা,
তবু মুখ ফিরাল না ।

আপন মালাটি আমারে পরান্নে দিল,
কহিলু তাহারে, মালায় কি কাজ ছিল !
সখি ওলো সখি নাহি তার লাজ ভয়,
মিছে তারে অহ্ননয় !

আমার মালাটি চলিল গলায় লয়ে,
চাহি তার পানে রহিলু অবাক্ হয়ে !
সখি ওলো সখী ভাসিতেছি আঁখিনীরে,—
কেন সে এল না ফিরে !

১৩০৪ ।

পিয়াসী ।

আমি ত চাহিনি কিছু ।
বনের আড়ালে দাঁড়ায়ে ছিলাম
নয়ন করিয়া নীচু ।

তখনো ভোরের আলস-অরুণ
 অঁখিতে রয়েছে ঘোর,
 তখনো বাতাসে জড়ানো রয়েছে
 নিশির শিশির লোর ।
 নূতন তুণের উঠিছে গন্ধ
 মন্দ প্রভাত বায়ে ;
 তুমি একাকিনী কুটীর বাহিরে
 বসিয়া অশথ-ছায়ে
 নবীন-নবনী-নিন্দিত করে
 দোহন করিছ হৃদ্ধ ;
 আমি ত কেবল বিধুর বিভোল
 দাঁড়ায়ে ছিলাম মুগ্ধ ।

আমি ত কহি নি কথা ।
 বকুল শাখায় জানি না কি পাখী
 কি জানাল ব্যাকুলতা !
 আশ্র কাননে ধরেছে মুকুল,
 ঝরিছে পথের পাশে ;
 গুঞ্জনস্বরে হয়েকটি করে
 মৌমাছি উড়ে আসে ।
 সরোবর পারে খুলিছে ছয়ার
 শিবমন্দির ঘরে,

সন্ধ্যাসী গাহে ভোরের ভজন
 শান্ত গভীর স্বরে ।
 ঘট লয়ে কোলে বসি তরুতলে
 দোহন করিছ হৃৎক ;
 শূন্য পাত্র বহিয়া মাত্র
 দাঁড়ায়ে ছিলাম লুপ্ত ।

আমি ত যাইনি কাছে ।
 উতলা বাতাস অলকে তোমার
 কি জানি কি করিয়াছে ।
 ঘণ্টা তখন বাজিছে দেউলে
 আকাশ উঠিছে জাগি ;
 ধরণী চাহিছে উর্দ্ধগগণে
 দেবতা-আশিষ মাগি ।
 গ্রামপথ হতে প্রভাত আলোতে
 উড়িছে গোখুর ধূলি,—
 উছলিত ঘট বেড়ি কটিতটে
 চলিয়াছে বধুগুলি ।
 তোমার কঁাকণ বাজে ঘন ঘন
 ফেনায়ে উঠিছে হৃৎক

পিয়াসী নয়নে ছিহ্ন এক কোণে
পরাণ নীরবে কুহু ।

১৩০৪ ।

পসারিণী ।

ওগো পসারিণী, দেখি আর,
কি রয়েছে তব পসরায় !
এত ভার মরি মরি কেমনে রয়েছে ধরি
কোমল করুণ ক্লান্তকায় !
কোথা কোন্ রাজপুরে যাবে আরো কতদূরে
কিসের ছরহ ছরাশায় !
সম্মুখে দেখ ত চাহি, পথের যে সীমা নাহি,
তপ্তবালু অগ্নিবাণ হানে !
পসারিণী কথা রাখো, দূর পথে ঘুমোনাকো,
ক্ষণেক দাঁড়াও এইখানে !

হেথা দেখ শাখা-ঢাকা বাঁধা বটতল ;
কূলে কূলে ভরা দিঘি, কাকচক্ষু জল ।
ঢালু পাড়ি চারি পাশে কচি কচি কাঁচা ঘাসে
ঘনশ্রাম চিকণ-কোমল !

পাষাণের ঘাটখানি, কেহ নাই জনপ্রাণী,
 আশ্রয়ন নিবিড় শীতল ।
 থাক্ তব বিকি-কিনি, ওগো শ্রান্ত পসারিণী,
 এইখানে বিছাও অঞ্চল !

ব্যথিত চরণ ছুটি ধুয়ে নিবে জলে,
 বনফুলে মালা গাঁথি পরি নিবে গলে ।
 আশ্র মঞ্জরীর গন্ধ বহি আনি মুহুম্বল
 বায়ু তব উড়াষে অলক,
 যুষ্ণুডাকে ঝিল্লিরবে, কি মন্ত্র শ্রবণে কবে,
 মুদে বাবে চোখের পলক !
 পসরা নামায়ে ভ্রমে যদি ঢুলে পড় ঘুমে,
 অঙ্গে লাগে স্নাতালস ঘোর ।
 যদি ভুলে তজ্রাভরে, ঘোমটা খসিয়া পড়ে,
 তাহে কোন শঙ্কা নাই তোর !

যদি সন্ধ্যা হয়ে আসে, সূর্য্য যায় পাটে ;
 পথ নাই দেখা যায় জনশূন্য মাঠে,—
 নাই গেলে বহুদূরে, বিদেশের রাজপুরে,
 নাই গেলে রতনের হাটে !
 কিছু না করিয়ো ডর, কাছে আছে মোর ঘর,
 পথ দেখাইয়া যাব আগে ;

শলীহীন অন্ধ রাত, ধরিয়ে আমার হাত,
 যদি মনে বড় ভয় লাগে !
 শয্যা শুভ্রফেননিভ, স্বহস্তে পাতিয়া দিব,
 গৃহকোণে দীপ দিব আলি,
 হৃৎক-দোহনের রবে কোকিল জাগিবে যবে
 আপনি জাগিয়ে দিব কালি !
 ওগো পসারিণী
 মধ্যদিনে রুদ্ধ ঘরে, সবাই বিশ্রাম করে
 দৃঢ় পথে উড়ে তপ্তবালি,
 দাঁড়াও, যেওনা আর, নামাও পসরা ভার,
 মোর হাতে দাও তব ডালি !

১৩০৪ ।

ভ্রষ্ট লগ্ন ।

শয়ন-শিরের প্রদীপ নিবেছে সবে,
 জাগিয়া উঠেছি ভোরের কোকিল-রবে ।
 অলসচরণে বসি বাতায়নে এসে
 নূতন মালিকা পরেছি শিথিল কেশে ।

এমন সময়ে অরুণ-ধূসর পথে
 তরুণ পথিক দেখা দিল রাজ্যপথে ।
 সোনার মুকুটে পড়েছে উবার আলো,
 মুকুতার মালা গলায় সেজেছে ভালো ।
 শুধাল কাতরে—“সে কোথায় সে কোথায় !”
 ব্যগ্রচরণে আমারি ছুয়ারে নামি,—
 সরমে মরিয়া বলিতে নারিছু হায়,
 “নবীন পথিক, সে যে আমি, সেই আমি !”

গোখুলি বেলায় তখনো জ্বলেনি দীপ,
 পরিতেছিলাম কপালে সোনার টীপ ;—
 কনক মুকুর হাতে লয়ে বাতায়নে—
 বাঁধিতেছিলাম কবরী আপন মনে ।
 হেনকালে এল সন্ধ্যাধূসর পথে
 করুণ-নয়ন তরুণ পথিক রথে ।
 ফেনায় ঘর্ম্মে আকুল অশ্বগুলি
 বসমে ভূষণে ভরিয়া গিয়াছে ধূলি ।
 শুধাল কাতরে “সে কোথায়, সে কোথায় !”
 ক্লান্তচরণে আমারি ছুয়ারে নামি ।
 সরমে মরিয়া বলিতে নারিছু হায়
 “শ্রান্ত পথিক, সে যে আমি, সেই আমি !”

ফাগুন যামিনী, প্রদীপ জলিছে ঘরে,

দখিণ বাতাস মরিছে বুকের পরে ।

সোনার খাঁচায় ঘুমায় মুখরা শারী,

হুয়ার সমুখে ঘুমায়ে পড়েছে দ্বারী ।

ধূপের ধোঁয়ায় ধূসর বাসর-গেহ

অগুরুগন্ধে আকুল সকল দেহ ।

ময়ূরকণ্ঠী পরেছি কাঁচলখানি,

দূর্কীশ্রামল আঁচল বন্ধে টানি ।

রয়েছি বিজন রাজপথপানে চাহি,

বাতায়নতলে বসেছি ধূলায় নামি’,—

ত্রিধামা যামিনী একা বসে গান গাহি,

“হতাশ পথিক, সে যে আমি, সেই আমি !”

১৩০৪ ।

প্রণয় প্রশ্ন ।

এ কি তবে সবি সত্য

হে আমার চিরভক্ত ?

আমার চোখের বিজুলি-উজল আলোকে

হৃদয়ে তোমার বাক্যের মেঘ বলকে,

এ কি সত্য ?

আমার মধুর অধর, বধূর
নব লাজ সম রক্ত,
হে আমার চিরভক্ত
এ কি সত্য ?

চির-মন্দার ফুটেছে আমার মাঝে কি ?
চরণে আমার বীণা-ঝঙ্কার বাজে কি ?
এ কি সত্য ?
নিশির শিশির ঝরে কি আমারে হেরিয়া ?
প্রভাত-আলোকে পুলক আমারে ঘেরিয়া
এ কি সত্য ?
তপ্ত কপোল পরশে অধীর
সমীর মদির মত্ত,
হে আমার চিরভক্ত
এ কি সত্য ?

কালো কেশপাশে দিবস লুকায় আধারে,
মরণ-বাধন মোর ছই-ভুজে বাঁধারে
এ কি সত্য ?
ভুবন মিলায় মোর অঞ্চল থানিতে,
বিশ্ব নীরব মোর কণ্ঠের বাণীতে
এ কি সত্য ?

ত্রিভুবন লয়ে শুধু আমি আছি,
আছে মোর অমরত্ব,
হে আমার চিরভক্ত
এ কি সত্য ?

তোমার প্রণয় যুগে যুগে মোর লাগিয়া
জগতে জগতে ফিরিতেছিল কি জাগিয়া ?
এ কি সত্য ?

আমার বচনে নয়নে অধরে অলকে
চির জনমের বিরাম লভিলে পলকে
এ কি সত্য ?

মোর স্নকুমার ললাট-ফলকে
লেখা অসীমের তত্ত্ব,
হে আমার চিরভক্ত
এ কি সত্য ?

আশা ।

এ জীবনস্বৰ্ঘ্য যবে অন্তে গেল চলি,
 হে বঙ্গজননী মোর, “আয় বৎস,” বলি
 খুলি দিলে অন্তঃপুরে প্রবেশ-দ্বার,
 লক্ষ্যটে চুখন দিলে ; শিয়রে আমার
 জালিলে অনন্ত দীপ । ছিল কণ্ঠে মোর
 একখানি কণ্টকিত কুসুমের ডোর
 সঙ্গীতের পুরস্কার, তারি ক্ষত জ্বালা
 হৃদয়ে জলিতেছিল,—তুলি সেই মালা
 প্রত্যেক কণ্টক তার নিজ হস্তে বাছি
 ধুলি তার ধুয়ে ফেলি শুভ্র মালাগাছি
 গলায় পরায়ে দিয়ে লইলে বরিয়া
 মোরে তব চিরন্তন সন্তান করিয়া ।
 অশ্রুতে ভরিয়া উঠি খুলিল নয়ন ;
 সহসা জাগিয়া দেখি—এ শুধু স্বপন !

বঙ্গলক্ষ্মী ।

তোমার মাঠের মাঝে, তব নদীতীরে,
তব আশ্রবনেঘেরা সহস্র কুটীরে,
দোহন-মুখর গোষ্ঠে, ছান্নাবটমূলে,
গঙ্গার পাষাণ ঘাটে ছাদশ দেউলে,
হে নিত্যকল্যাণী লক্ষ্মী, হে বঙ্গ-জননী,
আপন অজস্র কাজ করিছ আপনি
অহর্নিশি হাস্তমুখে ।

এ বিশ্বমমাজে

তোমার পুত্রের হাত নাহি কোন কাজে
নাহি জান সে বারতা ! তুমি শুধু, মা গো,
নিদ্রিত শিয়রে তার নিশিদিন জাগো
মলয় বীজন করি ! রয়েছ মা ভুলি
তোমার শ্রীঅঙ্গ হতে একে একে খুলি
সৌভাগ্য-ভূষণ তব, হাতের কঙ্কণ,
তোমার-ললাট-শোভা সীমন্ত-রতন,
তোমার গৌরব, তারা বাঁধা রাখিয়াছে
বহুদূর বিদেশের বণিকের কাছে !
নিত্যকর্ণে রত শুধু, অগ্নি মাতৃহৃদি,

প্রভ্যাষে পূজার ফুল ফুটাইছ তুমি,
 মধ্যাহ্নে পল্লবাঞ্চল প্রসারিয়া ধরি'
 রোদ্র নিবারিছ,—যবে আসে বিভাবরী
 চারিদিক হতে তব যত নদ নদী
 ঘুম পাড়াবার গান গাহে নিরবধি
 ঘেরি ক্লাস্ত গ্রামগুলি শত বাহুপাশে !
 শরৎ মধ্যাহ্নে আজি স্বপ্ন অবকাশে
 কণিক বিরাম দিয়া পুণ্য গৃহকাজে
 হিল্লোলিত হৈমন্তিক মঞ্জরীর মাঝে
 কপোত-কুঞ্জনাটুল নিস্তব্ধ প্রহরে
 বসিয়া রয়েছ মাতঃ, প্রফুল্ল অধরে
 বাক্যহীন প্রসন্নতা ; স্নিগ্ধ আঁখিদ্বয়
 ধৈর্য্যশাস্ত দৃষ্টিপাতে চতুর্দিক্‌ময়
 ক্ষমাপূর্ণ আশীর্বাদ করে বিকিরণ !
 হেরি সেই স্নেহপ্লুত আত্মবিস্মরণ,
 মধুর মঙ্গলচ্ছবি মৌন অবিচল,
 নতশির'কবিচক্ষে ভরি আসে জল !

শরৎ ।

✓ শরৎ ।

আজি কি তোমার মধুর স্মৃতি
 হেরিছু শারদ প্রভাতে !
 হে মাত বঙ্গ, শ্রামল অঙ্গ
 বলিছে অমল শোভাতে !
 পারে না বহিতে নদী জল-ধার,
 মাঠে মাঠে ধান ধরেনাক আর,
 ডাকিছে দোয়েল, গাহিছে কোয়েল
 তোমার কানন-সভাতে !
 মাঝখানে তুমি দাঁড়িয়ে জননী
 শরৎকালের প্রভাতে !

জননী তোমার শুভ আহ্বান
 গিয়েছে নিখিল ভুবনে,—
 নূতন ধাত্তে হবে নবান্ন
 তোমার ভবনে ভবনে !
 অবসর আর নাহিক তোমার,
 আঁঠি আঁঠি ধান চলে ভারে ভার,
 গ্রামপথে-পথে গন্ধ তাহার
 ভরিয়া উঠিছে পবনে ।
 জননী তোমার আহ্বান লিপি
 পাঠায় দিগ্বেছ ভুবনে !

তুলি মেঘভার আকাশ তোমার
 করেছ সুনীলবরণী ;
 শিশির ছিটায় করেছ শীতল
 তোমার শ্রামল ধরণী !
 স্থলে জলে আর গগনে গগনে
 বাঁশী বাজে যেন মধুর লগনে,
 আসে দলে দলে তব দ্বারতলে
 দিশি দিশি হতে তরণী !
 আকাশ করেছ সুনীল অমল
 সিন্ধু শীতল ধরণী !

বহিছে প্রথম শিশির-সমীর
 ক্লান্ত শরীর জুড়ায়,—
 কুটীরে কুটীরে নব নব আশা
 নবীন জীবন উড়ায় !
 দিকে-দিকে মাতা কত আয়োজন ;
 হাসিভরা মুখ তব পরিজন
 ভাঙারে তব স্নেহ নব নব
 মুঠা মুঠা লয় কুড়ায় !
 ছুটেছে সমীর আঁচলে তাহার
 নবীন জীবন উড়ায় !

আর আর আর, আছ যে যেথায়
 আর তোরা সবে ছুটিয়া,
 তাগুরদ্বার খুলেছে জননী
 অন্ন যেতেছে লুটিয়া !
 ওপার হইতে আর খেয়া দিয়ে,
 ওপাড়া হইতে আর মায়ে নিয়ে,
 কে কাঁদে কুধায় জননী শুধায়
 আর তোরা সবে জুটিয়া !
 তাগুরদ্বার খুলেছে জননী
 অন্ন যেতেছে লুটিয়া !

মাতার কণ্ঠে শেফালি-মালা
 গন্ধে ভরিছে অবনী ।
 জলহারা মেঘ আঁচলে খচিত
 জ্বল যেন সে নবনী !
 পরেছে কিরীট কনক কিরণে,
 মধুর মহিমা হবিতে হিরণে,
 কুসুম-ভূষণ জড়িত-চরণে
 দাঁড়ায়েছে মোর জননী !
 আলোকে শিশিরে কুসুমে ধাত্তে
 হাসিছে নিখিল অবনী !

মাতার আহ্বান ।

বারেক তোমার হৃদয়ে দাঁড়ায়ে
 কুকারিয়া ডাক জননি !
 প্রান্তরে তব সন্ধ্যা নামিছে
 অঁধারে ঘেরিছে ধরণী ।
 ডাক “চলে আয়, তোরা কোলে আয়,”
 ডাক সক্রুণ আপন ভাষায় !
 সে বাণী হৃদয়ে করুণা জাগায়,
 বেজে উঠে শিরা ধমনী,
 হেলায় খেলায় যে আছে যেথায়
 সচকিয়া উঠে অমনি !

আমরা প্রভাতে নদী পার হ’লু,
 ফিরিলু কিসের ছরাশে !
 পরের উল্লু অঞ্চলে লয়ে
 চালিলু জঠর-হতাশে !
 থেয়ী বহেনাকো, চাহি ফিরিবারে,
 তোমার তরণী পাঠাও এ পারে,
 আপনার ক্ষেত গ্রামের কিনারে
 পড়িয়া রহিল কোথা সে !
 বিজন বিরাট শূন্য সে মাঠ
 কাঁদিছে উতলা বাতাসে !

কাঁপিয়া কাঁপিয়া দীপখানি তব
 নিবু-নিবু করে পবনে,
 জননি, তাহারে করিয়ো রক্ষা
 আপন বক্ষ-বসনে !
 তুলি ধর তারে দক্ষিণ করে,
 তোমার ললাটে যেন আলো পড়ে,
 চিনি দূর হতে, ফিরে আসি ঘরে,
 না ভুলে আলেয়া-ছলনে !
 এ পারে হুয়ার রুদ্ধ জননি,
 এ পর-পুরীর ভবনে ।

তোমার বনের ফুলের গন্ধ
 আসিছে সন্ধ্যাসমীরে ।
 শেষ গান গাহে তোমার কোকিল
 স্বদূর কুঞ্জতিমিরে ।
 পথে কোন লোক নাহি আর বাকী,
 গহন কাননে জলিছে জোনাকী,
 আকুল অশ্রু ভরি দুই আঁখি
 উচ্ছ্বসি উঠে অধীরে ।
 “তোরা যে আমার” ডাক একবার
 দাঁড়ায়ে হুয়ার-বাহিরে !

ভিক্ষায়াং নৈব নৈবচ ।

যে তোমাতে দূরে রাখি নিত্য ঘৃণা করে,
 হে মোর স্বদেশ,
 মোরা তারি কাছে ফিরি সম্মানের তরে
 পরি তারি বেশ !
 বিদেশী জানেনা তোরে অনাদরে তাই
 করে অপমান,
 মোরা তারি পিছে থাকি যোগ দিতে চাই
 আপন সন্তান !
 তোমার যা দৈন্য, মাতঃ, তাই ভূষা মোর
 কেন তাহা ভুলি,
 পরধনে ধিক্ গর্ব, করি করঘোড়,
 ভরি ভিক্ষা ঝুলি !
 পুণ্যহস্তে শাকঅন্ন তুলে দাও পাতে
 তাই যেন রুচে,
 মোটাবস্ত্র বুনে দাও যদি নিজ হাতে
 তাহে লজ্জা ঘুচে !
 সেই সিংহাসন, যদি অঞ্চলটি পাত,
 কর স্নেহ দান !
 যে তোমাতে তুচ্ছ করে, সে আমায়ে, মাতঃ,
 কি দিবে সম্মান !

হতভাগ্যের গান ।

৩৯

হতভাগ্যের গান ।

বিভাস । একতলা ।

বন্ধু !

কিসের তরে অশ্রু ঝরে,
কিসের লাগি দীর্ঘশ্বাস !
হাস্যমুখে অদৃষ্টেরে
করব মোরা পরিহাস !
রিক্ত যারা সর্বহারা
সর্বজয়ী বিধে তারা,
গর্বময়ী ভাগ্যদেবীর
নয়কো তারা ক্রীতদাস !
হাস্যমুখে অদৃষ্টেরে
করব মোরা পরিহাস !

আমরা স্থথের ক্ষীতবৃকের
ছায়ার তলে নাহি চরি !
আমরা হুথের বক্রমুথের
চক্র দেখে ভয় না করি !
ভগ্ন ঢাকে যথাসাধ্য
বাজিয়ে যাব জয়বাদ্য,

ছিন্ন আশার ধবজা তুলে
 ভিন্ন করব নীলাকাশ !
 হাস্যমুখে অদৃষ্টেরে
 করব মোরা পরিহাস !

হে অলঙ্ঘ্য, কক্ষকেশী,
 তুমি দেবি অচঞ্চলা !
 তোমার রীতি সরল অতি
 নাহি জান ছলাকলা !
 জ্বালাও পেটে অগ্নিকণা
 নাইক তাহে প্রতারণা.
 টানো যখন মরণ ফাঁসি
 বগনাক মিষ্টভাষ !
 হাস্যমুখে অদৃষ্টেরে
 করব মোরা পরিহাস !

ধরার যারা সেরা সেরা
 মানুষ তারা তোমার ঘরে ।
 তাদের কঠিন শয্যাখানি
 তাই পেতেছ মোদের তরে ।
 আমরা বরপুত্র তব,
 বাহাই দিবে তাহাই লব,

তোমায় দিব ধন্যধ্বনি
মাথায় বহি সর্কনাশ !
হাস্যমুখে অদৃষ্টেরে
করব মোরা পরিহাস !

যৌবরাজ্যে বসিয়ে দে মা
লক্ষীছাড়ার সিংহাসনে !
ভাঙ্গা কুলোয় করুক পাথা
তোমার যত ভূতাগণে !
দগ্ধভালে প্রলয় শিখা
দিক্ মা এঁকে তোমার টাঁকা,
পরাও সজ্জা লজ্জাহারা
জীর্ণ কন্যা, ছিন্নবাস !
হাস্যমুখে অদৃষ্টেরে
করব মোরা পরিহাস !

লুকোক্ তোমার ডঙ্কা শুনে
কপট সখার শূন্য হাসি !
পালাক্ ছুটে পুচ্ছ তুলে
মিথ্যে চাটু মক্কা কাশি !
আত্মপরের প্রভেদ-ভোলা,
জীর্ণ দুয়ের নিত্য খোলা,

থাকবে তুমি থাকব আমি
 সমান ভাবে বারো মাস !
 হাস্যমুখে অদৃষ্টেরে
 করব মোরা পরিহাস !

শঙ্কা তরান লজ্জা সরম,
 চুকিয়ে দিলেম স্ততি-নিন্দে ।
 ধূলো, সে তোরা পায়ের ধূলো,
 তাই মেখেছি ভক্তবৃন্দে !
 আশারে কই, “ঠাকুরাণী,
 তোমার খেলা অনেক জানি,
 যাহার ভাপো সকল ফাঁকি
 তারেও ফাঁকি দিতে চাস !”
 হাস্যমুখে অদৃষ্টেরে
 করব মোরা পরিহাস !

মৃত্যু যেদিন বলবে “জাগো,
 প্রভাত হল তোমার রাত্তি”—
 নিবিরে বাব আমার ঘরের
 চন্দ্র সূর্য্য ছটো বাতি ।
 আমরা দৌঁছে ঘেঁষাঘেঁষি
 চিরদিনের প্রতিবেশি,

জুতা-আবিষ্কার ।

৪৩

বন্ধুভাবে কণ্ঠে ধসে মোর
জড়িয়ে দেবে বাহুপাশ,—
বিদায় কালে অদৃষ্টেরে
করে যাব পরিহাস !

—
১৩০৪ ।

জুতা-আবিষ্কার ।

কহিলা হবু “শুন গো গোবুরায়,
কালিকে আমি ভেবেছি সারারাত্র—
মলিন ধূলা লাগিবে কেন পায়
ধরণীমাঝে চরণ ফেলা মাত্র !
তোমরা শুধু বেতন লহ বাঁটি
রাজ্যের কাজে কিছুই নাহি দৃষ্টি !
আমার মাটি লাগায় মোরে মাটি,
রাজ্যে মোর একি এ অনাস্থি !
শীঘ্র এর করিবে প্রতিকার
নহিলে কারো রক্ষা নাহি আর !”

গুনিয়া গোবু ভাবিয় হল খুন,
 দারুণ ত্রাসে ঘর্ম্ম বহে গাত্রে !
 পণ্ডিতের হইল মুখ চুণ
 পাত্রদের নিদ্রা নাহি রাহে !
 রান্নাঘরে নাহিক চড়ে হাঁড়ি,
 কান্নাকাটি পড়িল বাড়িমধ্যে,
 অশ্রুজলে ভাসায়ে পাকা দাড়ি
 কহিলা গোবু হবুর পাদপদ্মে,—
 “যদি না ধূলা লাগিবে তব পায়ে
 পায়ের ধূলা পাইব কি উপায়ে !”

গুনিয়া রাজা ভাবিল ছলি ছলি,
 কহিল শেষে “কথাটা বটে সত্য,
 কিন্তু আগে বিদায় কর ধূলি,
 ভাবিয়ো পরে পদধূলির তত্ত্ব !
 ধূলা-অভাবে না পেলো পদধূলা
 তোমরা সবে মাহিনা খাও মিথ্যে,
 কেন’ বা তবে পুষ্টি নু এতগুলো
 উপাধি-ধরা বৈজ্ঞানিক ভৃত্যে !
 আগের কাজ আগে ত তুমি সারো
 পরের কথা ভাবিয়ো পরে আরো !”

অঁধার দেখে রাজার কথা শুনি,
 যতনভরে আনিল তবে মন্ত্রী
 যেখানে যত আছিল জ্ঞানীশুণী
 দেশে বিদেশে যতেক ছিল যন্ত্রী !
 বসিল সবে চসমা চোখে অঁটি,
 ফুরায়ে গেল উনিশ পিপে নস্য,
 অনেক ভেবে কহিল “গেলে মাটি
 ধরায় তবে কোথায় হবে শস্য !”
 কহিল রাজা “তাই যদি না হবে,
 পণ্ডিতেরা রহেছ কেন তবে ?”

সকলে মিলি যুক্তি করি শেষে
 কিনিল ঝাঁটা সাড়ে সতেরো লক্ষ,
 ঝাঁটের চোটে পথের ধুলো এসে
 ভরিয়া দিল রাজার মুখ বক্ষ !
 ধূলায় কেহ মেলিতে নারে চোখ,
 ধুলার মেঘে পড়িল ঢাকা সূর্য্য ;
 ধুলার বেগে কাশিয়া মরে লোক,
 ধুলার মাঝে নগর হল উছ ।
 কহিল রাজা, “করিতে ধূলা দূর,—
 জগত হল ধূলায় ভর-পূর !”

তখন বেগে ছুটিল ঝাঁকে ঝাঁক
 মশক কাঁখে একুশলাখ ভিত্তি ।
 পুকুরে বিলে রহিল শুধু পাক,
 নদীর জলে নাহিক চলে কিস্তি ;
 জলের জীব মরিল জল বিনা,
 ডাঙ্গার প্রাণী সাতার করে চেষ্টা ;
 পাকের তলে মজিল বেচা-কিনা,
 সর্দিজরে উজাড় হল দেশটা !
 কহিল রাজা “এমনি সব গাধা
 ধূলারে মারি করিয়া দিল কাদা !”

আবার সবে ডাকিল পরামর্শে ;
 বসিল পুন যতেক গুণবস্ত ;
 ঘুরিয়া মাথা হেরিল চোখে শর্সে,
 ধুলার হায় নাহিক পায় অন্ত !
 কহিল “মহী মাতুর দিয়ে ঢাক ;
 ফরাস পাতি’ করিব ধূলা বন্ধ !”
 কহিল কেহ “রাজারে ঘরে রাখ
 কোথাও যেন না থাকে কোন রন্ধ !
 ধুলার মাঝে না যদি দেন পা
 তা হলে পায়ে ধূলা ত লাগে না !”

কহিল রাজা “সে কথা বড় খাঁটি,
কিন্তু মোর হতেছে মনে সন্ধ
মাটির ভয়ে রাজ্য হবে মাটি
দিবসরাতি রহিলে আমি বন্ধ !”
কহিল সবে “চামারে তবে ডাকি
চন্দ্র দিয়া মুড়িয়া দাও পৃথ্বী !
ধূলির মহী ঝুলির মাঝে ঢাকি
মহীপতির রহিবে মহাকীর্তি !”
কহিল সবে “হবে সে অবহেলে,
যোগ্যমত চামার যদি মেলে !”

রাজার চর ধাইল হেথা হোথা,
ছুটিল সবে ছাড়িয়া সব কর্ম ।
যোগ্যমত চামার নাহি কোথা,
না মিলে তত উচিতমত চন্দ্র !
তখন ধীরে চামার-কুলপতি
কহিল এসে ঈষৎ হেসে বৃদ্ধ,—
“বলিতে পারি করিলে অনুমতি
সহজে যাহে মানস হবে সিদ্ধ !
নিজের ছুটি চরণ ঢাক, তবে
ধরণী আর ঢাকিতে নাহি হবে !”

কহিল রাজা “এত কি হবে সিধে,
 ভাবিয়া ম’ল সকল দেশবুদ্ধ !”
 মন্ত্রী কহে “বেটারে শূল বিধে
 কারার মাঝে করিয়া রাখ রুদ্ধ !”
 রাজার পদ চর্ম-আবরণে
 ঢাকিল বুড়া বসিয়া পদোপান্তে ;
 মন্ত্রী কহে “আমারো ছিল মনে,
 কেমনে বেটা পেরেছে সেটা জান্তে !”
 সেদিন হতে চলিল জুতো-পরা,
 বাঁচিল গোরু, রক্ষা পেল ধরা ।

 ১৩০৪ ।

সে আমার জননী রে !

ভৈরবী । রূপক ।
 কে এসে যায় ফিরে ফিরে
 আকুল নয়নের নীরে ?
 কে বৃথা আশাভরে
 চাহিছে মুখপরে ?
 সে যে আমার জননী রে !

সে আমার জননী রে ।

১৯

কাহার অধামরী বাণী
মিলায় অনাদর মানি ?
কাহার ভাষা হার
ভুলিতে সবে চায় ?
সে যে আমার জননী রে !

অগেক স্নেহকোল ছাড়ি’
চিনিতে আর নাহি পারি ।
আপন সন্তান
করিছে অপমান,—
সে যে আমার জননী রে !

বিরল কুটীরে বিষম
কে বসে’ সাজাইয়া অন্ন ?
সে স্নেহ-উপহার
রুচে না মুখে আর !
সে যে আমার জননী রে !

জগদীশচন্দ্র বসু ।

বিজ্ঞান-লক্ষীর প্রিয় পশ্চিম মন্দিরে
 দূর সিদ্ধুতীরে
 হে বন্ধু গিয়েছ তুমি ; জয়মাণ্যথানি
 সেথা হতে আনি
 দীনহীনা জননীর লজ্জানত শিরে
 পরায়েছ ধীরে ।

বিদেগের মহোজ্জল মহিমা-মণ্ডিত
 পণ্ডিত-সভায়
 বত সাধুবাদধ্বনি নানা কণ্ঠরবে
 শুনেছ গোরবে !
 সে ধ্বনি গভীর মন্ড্রে ছায় চারিধার
 হয়ে সিদ্ধুপার ।

আজি মাতা পাঠাইছে—অশ্রুসিক্ত বাণী
 আশীর্বাদ থানি
 জগৎ-সভার কাছে অখ্যাত অজ্ঞাত
 কবিকণ্ঠে ভ্রাতঃ !
 সে বাণী পশিবে শুধু তোমারি অন্তরে
 ক্ষীণ মাতৃস্বরে !

ভিখারী ।

৫৯

ভিখারী ।

ভৈরবী । একতারা ।

ওগো কাঙাল, আমারে কাঙাল করেছ,
আরো কি তোমার চাই ?

ওগো ভিখারী, আমার ভিখারী, চলেছ
কি কাতর গান গাই' !

প্রতিদিন প্রাতে নব নব ধনে
ভুগিব তোমারে সাধ ছিল মনে
ভিখারী, আমার ভিখারী !

হায় পলকে সকলি সঁপেছি চরণে,
আর ত কিছুই নাই !

ওগো কাঙাল, আমারে কাঙাল করেছ
আরো কি তোমার চাই !

আমি আমার বুকের আঁচল ঘেরিয়া
তোমাতে পরা'নু বাস ;

আমি আমার ভুবন শূন্য করেছি
তোমার পূরাতে আশ !
মম প্রাণ মন ঘোবন নব
করপুটতলে পড়ে আছে তব,
ভিখারী, আমার ভিখারী !

হার আরো যদি চাও, মোরে কিছু দাও,
ফিরে আমি দিব তাই !

ওগো কাঙাল, আমারে কাঙাল করেছ,
আরো কি তোমার চাই !

✓ যাচনা ।

ভালবেসে সখি নিভূতে যতনে

আমার নামটি লিখিয়ো—তোমার
মনের মন্দিরে !

আমার পরাণে যে গান বাজিছে

তাহারি ভালটি লিখিয়ো—তোমার
চরণ-মঞ্জীরে !

ধরিয়া রাখিয়ো সোহাগে আদরে

আমার মুখর পাখীটি—তোমার
প্রাসাদ-প্রাঙ্গণে !

মনে করে সখি বাঁধিয়া রাখিয়ো

আমার হাতের রাখীটি—তোমার
কনক কঙ্কণে !

আমার লতার একটি মুকুল
 ভুলিয়া ভুলিয়া রাখিয়ো—তোমার
 অলক-বন্ধনে !
 আমার স্মরণ-গুভ-সিন্দূরে
 একটি বিন্দু অঁকিয়ো—তোমার
 ললাট চন্দনে !

আমার মনের মোহের মাধুরী
 মাখিয়া রাখিয়া দিয়োগো—তোমার
 অঙ্গ সৌরভে !
 আমার আকুল জীবন মরণ
 টুটিয়া লুটিয়া নিয়োগো—তোমার
 অতুল গৌরবে !

বিদায় ।

বিভাস ।

এবার চলিছ তবে !
 সময় হয়েছে নিকট, এখন
 বাধন ছিঁড়িতে হবে ।

উচ্ছল জল করে ছলছল,
 জাগিয়া উঠেছে কল-কোলাহল,
 তরল-পতাকা চল-চঞ্চল
 কাঁপিছে অধীর রবে ।
 সময় হয়েছে নিকট, এখন
 বাঁধন ছিঁড়িতে হবে ।

আমি নিষ্ঠুর কঠিন কঠোর
 নিশ্চয় আমি আজি !
 আর নাই দেরী, তৈরব-ভেরী
 বাহিরে উঠেছে বাজি ।
 তুমি ঘুমাইছ নিমীল-নয়নে,
 কাঁপিয়া উঠিছ বিরহ-স্বপনে,
 প্রভাতে জাগিয়া শূন্য শয়নে
 কাঁদিয়া চাহিয়া রবে ।
 সময় হয়েছে নিকট, এখন
 ' বাঁধন ছিঁড়িতে হবে ।

অরুণ তোমার তরুণ অধর,
 করুণ তোমার আঁধি,
 অমিয়-রচন সোহাগ-বচন
 অনেক রয়েছে বাকি ।

পাখী উড়ে যাবে সাগরের পার,
 সুখময় নীড় পড়ে রবে তার,
 মহাকাশ হতে ওই বারেবার
 আমারে ডাকিছে সবে !
 সময় হয়েছে নিকট, এখন
 বাঁধন ছিঁড়িতে হবে ।

বিশ্বজগৎ আমারে মাগিলে
 কে মোর আত্মপর !
 আমার বিধাতা আমাতে জাগিলে
 কোথায় আমার ঘর !
 কিসেরি বা সুখ, কদিনের প্রাণ ?
 ওই উঠিয়াছে সংগ্রাম-গান !
 অমর মরণ রক্তচরণ
 নাচিছে সগৌরবে ।
 সময় হয়েছে নিকট, এখন
 বাঁধন ছিঁড়িতে হবে ।

লীলা ।

সিদ্ধু ভৈরবী ।

কেন বাজাও কাঁকণ কনকন, কত
 ছলভরে !
 ও গো ঘরে ফিরে চল, কনক কলসে
 জল ভরে' ।
 কেন জলে ঢেউ তুলি ছলকি ছলকি
 কর খেলা !
 কেন চাহ খনে-থনে চকিত নয়নে
 কার তরে
 কত ছল ভরে !
 হের যমুনা-বেলায় আলসে হেলায়
 গেল বেলা
 যত হাসিভরা ঢেউ করে কানাকানি
 কলস্বরে
 কর ছলভরে !
 হের নদী-পরপারে গগন কিনারে
 মেঘ-মেলা
 তারা হাসিয়া হাসিয়া চাহিছে তোমারি
 মুখ পরে
 কত ছল ভরে ।

নব বিবাহ ।

৫৭

নব বিবাহ ।

মল্লার ।

হেরিয়া শ্রামল ঘন নীল গগনে
সজল কাজল আঁধি পড়িল মনে ।
অধর কঙ্কণমাখা
মিনতি-বেদনা-আঁকা,
নীলবে চাহিয়া থাক
বিদায়-থণে ।
হেরিয়া শ্রামল ঘন নীল গগনে ।

ঝর ঝর ঝরে জল বিজুলি হানে,
পবন মাতিছে বনে পাগল গানে ।
আমার পরাণ-গুটে
কোন্‌খানে বাধা ফুটে,
কার কথা বেজে উঠে
হৃদয় কোণে !
হেরিয়া শ্রামল ঘন নীল গগনে ।

১৩০৪ ।

লজ্জিতা ।

ভৈরবী ।

যামিনী না যেতে জাগালে না কেন,

বেলা হল মরি লাজে !

সরমে জড়িত চরণে কেমনে

চলিব পথের মাঝে !

আলোক-পরশে মরমে মরিয়া

হেরগে শেফালি পড়িছে ঝরিয়া,

কোন মতে আছে পরাণ ধরিয়া

কামিনী শিথিল সাজে !

যামিনী না যেতে জাগালে না কেন

বেলা হল মরি লাজে !

নিবিয়া বাঁচিল নিশার প্রদীপ

উষার বাতাস লাগি ।

রঞ্জনের শশী গগনের কোণে

লুকায় শরণ মাগি !

পাখী ডাকি বলে—গেল বিভাবরী,—

বধূ চলে জলে লইয়া গাগরী,

আমি এ আকুল কবরী আবরি

কেমনে যাইব কাজে !

যামিনী না যেতে জাগালে না কেন

বেলা হল মরি লাজে !

কাল্পনিক ।

বেহাগ ।

আমি কেবলি স্বপন করেছি বপন

বাতাসে,—

তাই আকাশকুসুম করিলু চয়ন

হতাশে ।

ছায়ার মতন মিলায় ধরণী,

কূল নাহি পায় আশার তরণী,

মানস-প্রতিমা ভাসিয়া বেড়ায়

আকাশে ।

কিছু বাঁধা পড়িল না শুধু এ বাসনা-

বাঁধনে ।

কেহ নাহি দিল ধরা শুধু এ সুদূর

সাধনে ।

আপনার মনে বসিয়া একেলা

অনল-শিখায় কি করিলু খেলা,

দিন-শেষে দেখি ছাই হল সব

হতাশে ।

আমি কেবলি স্বপন করেছি বপন

বাতাসে !

মানসপ্রতিমা ।

ইমন কল্যাণ ।

তুমি সন্ধ্যার মেঘ শান্ত সুদূর,
 আমার সাধের সাধনা,
 মম শূন্য গগন-বিহারী !
 আমি আপন মনের মাধুরী মিশিয়ে
 তোমারে করেছি রচনা ;—
 তুমি আমারি যে তুমি আমারি,
 মম অসৌম্য গগন-বিহারী !

মম হৃদয়-রক্ত-রঞ্জনে, তব
 চরণ দিয়েছি রাঙিয়া,
 অগ্নি সন্ধ্যা-স্বপন-বিহারী !
 শব্দ অধর এঁকেছি স্নেহা বিবে মিশে
 মম স্নেহ হৃৎ ভাঙিয়া ;
 তুমি আমারি যে তুমি আমারি,
 মম বিজ্ঞান-জীবন-বিহারী !

মম মোহের স্বপন-অঞ্জন তব
 নয়নে দিয়েছি পরায়ে
 অগ্নি মুগ্ধ নয়ন-বিহারী ।

মম সঙ্গীত তব অঙ্গে অঙ্গে
 দিয়েছি জড়ায়ে জড়ায়ে ।
 তুমি আমারি যে তুমি আমারি,
 মম জীবন-মরণ-বিহারী ।

১৩০৪ ।

সংকোচ ।

ছায়া নট ।
 যদি বারণ কর তবে
 গাহিব না ।
 যদি সরম লাগে, মুখে
 চাহিব না ।
 যদি বিরলে মালা গাথা
 সহসা পায় বাধা,
 তোমার ফুলবনে
 যাইব না ।
 যদি বারণ কর, তবে
 গাহিব না ।

যদি থমকি থেমে যাও
 পথমাঝে
 আমি চমকি চলে যাব
 আন কাজে ।
 যদি তোমার নদীকূলে
 ভুলিয়া ঢেউ তুলে,
 আমার তরীখানি
 বাহিব না ।
 যদি বারণ কর, তবে
 গাহিব না ।

১৩০৪ ।


প্রার্থী ।

কালান্ধা ।

আমি চাহিতে এসেছি শুধু একখানি ঝালা,
 তব নব প্রভাতের নবীন শিশির-ঢালা ।
 সরমে জড়িত কত না গোলাপ
 কত না গরবী করবী

কত না কুসুম ফুটেছে তোমার
মালঞ্চ করি আলা ।
আমি চাহিতে এসেছি শুধু একখানি মালা ।

অমল শরত শীতল সমীপ
বহিছে তোমার কেশে.
কিশোর অরুণ-কিরণ, তোমাব
অধরে পড়েছে এসে ।
অঞ্চল হতে বনপথে ফুল
যেতেছে পড়িয়া ঝরিয়া
অনেক কুন্দ অনেক শেফালি
ভরেছে তোমার ডালা ।
আমি চাহিতে এসেছি শুধু একখানি মালা ।

কল্পনা।

 সকলকরণ।

আলোষণ।

সখি প্রতিদিন হায় এসে ফিরে যায় কে !
 তারে আমার মাথার একটি কুসুম দে !
 যদি শুধায় কে দিল, কোন্ ফুল-কাননে,
 তোর শপথ, আমার নামটি বলিস্নে !
 সখি প্রতিদিন হায় এসে ফিরে যায় কে !

সখি তরুর তলায় বসে সে ধূলায় যে !
 সেথা বকুলমালায় আসন বিছায়ে দে !
 সে যে করুণা ভাগ্যায় সকলকরণ নয়নে
 কেন কি বলিতে চায় না বলিয়া যায় সে !
 সখি প্রতিদিন হায় এসে ফিরে যায় কে !

১ বিবাহ-মঙ্গল ।

ঝিঁঝিট ।

ছুইটি হৃদয়ে একটি আসন
 পাতিয়া বস হে হৃদয়নাথ !
 কল্যাণ করে মঙ্গল ডোরে
 বাঁধিয়া রাখ হে দৌহার হাত ।
 প্রাণেশ, তোমারি প্রেম অনন্ত
 জাগাক্ জীবনে নব বসন্ত,
 নৃগল প্রাণের নবীন-মিলনে
 কর হে করুণ' নয়ন পাত ।
 সংসার পথ দীর্ঘ দারুণ,
 বাহিরিবে ছুট পাছ তরুণ,
 আজিকে তোমারি প্রসাদ-অরুণ
 করুক উদয় নব-প্রভাত !
 তব মঙ্গল তব মহত্ত্ব
 তোমারি মাধুরী তোমারি সত্য
 দৌহার চিত্তে রহুক নিত্য
 নব নব রূপে দিবসরাত ।

✓ ভারতলক্ষ্মী ।

ভৈরবী ।

অগ্নি ভুবনমনোমোহিনী !
 অগ্নি নিশ্চল সূর্য্য করোজ্জল ধরণী
 জনক-জননী-জননী !
 নীল-সিন্ধু-জল-ধৌত চরণতল,
 অনিল-বিকম্পিত শ্রামল অঞ্চল,
 অম্বর-চুম্বিত ভাল হিমাচল,
 শুভ্র-তুষার-কিরীটিনী ।
 প্রথম প্রভাত উদয় তব গগনে,
 প্রথম সামর্য তব তপোবনে,
 প্রথম প্রচারিত তব বনভবনে
 জ্ঞানধর্ম কত কাব্যকাহিনী ।
 চিব কল্যাণময়ী তুমি ধন্য,
 দেশ বিদেশে বিতরিছ অন্ন,
 জাহ্নবী যমুনা বিগলিত করুণা
 পণ্যপীযুষ-স্তুতবাহিনী !

প্রকাশ ।

হাজার হাজার বছর কেটেছে, কেহ ত কহেনি কথা ।
 ভ্রমর ফিরেছে মাধবীকুঞ্জে, তরুরে ঘিরেছে লতা ;
 চাঁদে চাহিয়া চকোরী উড়েছে, তড়িৎ খেলেছে মেঘে,
 সাগর কোথায় খুঁজিয়া খুঁজিয়া তটিনী ছুটেছে বেগে ;
 ভোরের গগনে অরণ উঠিতে কমল মেলেছে আঁধি,
 নবীন আষাঢ় বেমনি এসেছে চাতক উঠেছে ডাকি ;
 এত যে গোপন মনের মিলন ভুবনে ভুবনে আছে,
 সে কথা কেমনে হইল প্রকাশ প্রথম কাহার কাছে ।

না জানি সে কবি জগতের কোণে কোথা ছিল দিবানিশি,
 লতাপাতা-চাঁদ-মেঘের সহিতে এক হয়ে ছিল মিশি !
 ফুলের মতন ছিল সে মৌন মনের আড়ালে ঢাকা,
 চাঁদের মতন চাহিতে জানিত নয়ন স্বপনমাথা ;
 বায়ুর মতন পারিত ফিরিতে অলক্ষ্য মনোরঞ্জে
 ভাবনাসাধনা-বেদনাবিহীন বিফল ভ্রমণ-পথে ;
 মেঘের মতন আপনার মাঝে ঘনায় আপন ছায়া
 একা বসি কোণে জানিত রচিতে ঘন গম্ভীর মায়া !

জ্যলোকে ভুলোকে ভাবে নাই কেহ আছে সে কিসের খোঁজে,
 হেন সংশয় ছিল না কাহারো, সেবে কোন কথা বোঝে !

বিশ্বপ্রকৃতি তার কাছে তাই ছিলনাকো সাবধানে,
 ঘন ঘন তার ঘোমটা খসিত ভাবে ইঙ্গিতে গানে।
 বাসর ঘরের বাতায়ন যদি খুলিয়া যাইত কভু
 দ্বারপাশে তারে বসিতে দেখিয়া রুখিয়া দিত না তবু !
 যদি সে নিভৃত শয়নের পানে চাহিত নয়ন তুলি
 শিয়রের দীপ নিবাইতে কেহ ছুঁড়িত না ফুলধূলি !

শশি যবে নিত নয়নে নয়নে কুমুদীর ভালবাসা
 এরে দেখি হেসে ভাবিত এ লোক জানে না চোখের ভাষা !
 নলিনী যখন খুলিত পরাগ চাহি তপনের পানে
 ভাবিত এ জন ফুলগন্ধেব অর্থ কিছু না জানে !
 তড়িৎ যখন চকিত নিমেষে পালাত চুমিয়া মেঘে,
 ভাবিত, এ স্ক্যাপা কেমনে বুঝিবে কি আছে অগ্নিবেগে !
 সহকারশাখে কাঁপিতে কাঁপিতে ভাবিত মালতীলতা
 আমি জানি আর তরু জানে শুধু কলমশ্রমের কথা !

একদা ফাগুনে সন্ধ্যা-সময়ে সূর্য্য নিতেছে ছুটি,
 পূর্ব্ব-গগনে পূর্ণিমা চাঁদ করিতেছে উঠি উঠি ;
 কোনো পুরনারী তরু-আলবালে জল সেচিবার তানে
 ছল করে সাথে অঁচল বাধায়ে ফিরে চায় পিছুপানে ;
 কোনো সাহসিকা ছলিছে দোলায় হাসির বিজুলি হানি,
 না চাহে নামিতে না চাহে ধামিতে না মানে বিনম্রবাণী ;

কোন মায়াবিনী মৃগশিশুটিরে তৃণ দেয় একমনে,
পাশে কে দাঁড়ায়ে চিনেও তাহারে চাহে না চোখের কোণে !

হেন কালে কবি গাহিয়া উঠিল—নরনারী, শুন সবে,
কতকাল ধরে কি যে রহস্য ঘটিছে নিখিল ভবে !
এ কথা কে কবে স্বপনে জানিত—আকাশের চাঁদ চাহি
পাণ্ডুকপোল কুমুদীর চোখে সারারাত নিদ্র নাহি !
উদয়-অচলে অরুণ উঠিলে কমল ফুটে যে জলে
এতকাল ধরে তাহার তত্ত্ব ছাপা ছিল কোন ছলে !
এত যে মন্ত্র পড়িল ভ্রমর নবমালতীর কানে
বড় বড় যত পণ্ডিত জনা বুঝিল না তার মানে !

শুনিয়া তপন অন্তে নামিল সরমে গগন ভরি,
শুনিয়া চন্দ্র খমকি রহিল বনের আড়াল ধরি !
শুনে সরোবরে তথনি পদ্ম নগ্ন মুদিল স্বরা,
দখিন-বাতাস বলে গেল তারে—সকলি পড়েছে ধরা !
শুনে ছিছি বলে' শাখা নাড়ি নাড়ি শিহরি উঠিল লতা,
ভাবিল, মুখের এখনি না জানি আরো কি রটাবে কথা !
ভ্রমর কহিল যুথীর সভায়—যে ছিল বোবার মত
পরের কুৎসা রটাবার বেলা তারো মুখ ফোটে কত !

শুনিয়া তখনি করতালি দিয়ে হেসে উঠে নরনারী—
 যে বাহারে চায় ধরিয়া তাহার দাঁড়াইল সারি সারি ।
 “হয়েছে প্রমাণ, হয়েছে প্রমাণ” হাসিয়া সবাই কহে—
 “যে কথা রটেছে, একটি বর্ণ বানানো কাহারো নহে !”
 বাহতে বাহতে বাঁধিয়া কহিল নয়নে নয়নে চাহি—
 “আকাশে পাতালে মরতে আজিত গোপন কিছুই নাহি !”
 কহিল হাসিয়া মালা হাতে লয়ে পাশাপাশি কাছাকাছি,
 “ত্রিভুবন যদি ধরা পড়ি গেল তুমি আমি কোথা আছি !”

হায় কবি হায়, সে হতে প্রকৃতি হয়ে গেছে সাবধানী,—
 মাথাটি ঘেরিয়া বুকের উপরে আঁচল দিয়েছে টানি !
 বত ছলে আজ যত ঘুরে মরি জগতের পিছু পিছু
 কোন দিন কোন গোপন খবর নূতন মেলে না কিছু !
 শুধু গুঞ্জে কুঞ্জে গন্ধে সন্দেহ হয় মনে ;—
 লুকানো কথার হাওয়া বহে যেন বন হতে উপবনে ;
 মনে হয় যেন আলোতে ছায়াতে রয়েছে কি ভাব ভরা,—
 হায় কবি হায়, হাতে হাতে আর কিছুই পড়ে না ধরা ।

উন্নতি-লক্ষণ ।

(১)

ওগো পুরবাসী, আমি পরবাসী
 জগৎব্যাপারে অজ্ঞ,
 শুধাই তোমায় এ পুর-শালায়
 আজি এ কিসের যজ্ঞ ?
 সিংহ-ছুয়ারে পথের জু'ধারে
 রথের না দেখি অস্ত,—
 কার সম্মানে ভিড়েছে এখানে
 যত উন্নীযবস্ত ?
 বসেছেন ধীর অতি গম্ভীর
 দেশের প্রবীন বিজ্ঞ,
 প্রবেশিয়া ঘরে সঙ্কোচে ডরে
 মরি আমি অনভিজ্ঞ !
 কোন্ শূরবীর জন্মভূমির
 ঘুচাল হীনতাপঙ্ক ?
 ভারতের শুচি যশশশিকৃতি
 কে করিল অকলঙ্ক ?
 রাজা মহারাজ মিলেছেন আজ
 কাহারে করিতে ধন্য ?
 বসেছেন এঁরা পূজ্যজনেরা
 কাহার পূজার জন্য ?

(উত্তর)

গেল যে সাহেব ভরি ছুই জেব,
করিয়া উদর পূর্তি ;—
এঁরা বড়লোক করিবেন শোক
স্থাপিয়া তাহারি মূর্তি ।

—

অভাগা কে ওই মাগে নাম-সই,
দ্বারে দ্বারে ফিরে থিন্ন,
তবু উৎসাহে রচিবারে চাহে
কাহার স্মরণ চিহ্ন ?
সন্ধ্যাবেলায় ফিরে আসে হায়
নয়ন অশ্রুসিক্ত,
হৃদয় ক্ষুন্ন, খাতাটি শূন্য,
থলি একেবারে রিক্ত ।
বাহার লাগিয়া ফিরিছে মাগিয়া
' মুছি ললাটের ঘর্ম্ম,
স্বদেশের কাছে কি সে করিয়াছে ?
কি অপরাধের কর্ম্ম ?

(উত্তর)

আর কিছু নহে, পিতাপিতামহে
বসায় গেছে সে উচ্ছে,

জন্মভূমিরে সাজায়েছে ঘিরে

অমর-পুষ্পগুচ্ছে !

(২)

দেবী দশভূজা, হবে তাঁরি পূজা,

মিলিবে স্বজনবর্গ ;

হেথা এল কোথা দ্বিতীয় দেবতা,

নূতন পূজার অর্থ ?

কার সেবাতরে আসিতেছে ঘরে

আয়ুহীন মেঘবৎস ?

নিবেদিতে পারে আনে ভারে ভারে

বিপুল ভেটকি মৎস্য ?

কি আছে পাত্রে যাহার গাত্রে

বসেছে তুষিত মক্ষী ?

শলায় বিদ্ধ হতেছে সিদ্ধ

মত্ত-নিষিদ্ধ পক্ষী !

দেবতার সেরা কি দেবতা এঁরা,

পূজা ভবনের পূজ্য ?

যাহাদের পিছে পড়েগেছে নীচে

দেবী হয়ে গেছে উছ ।

(উত্তর)

ম্যাকে, ম্যাকিনন, অ্যালেন, ডিলন

দোকান ছাড়িয়া সখ

সববে গরবে পূজার পরবে
তুলেছেন পাদপদ্ম !

এসেছিল দ্বারে পূজা দেখিবারে
দেবীর বিনীত ভক্ত,
কেন যায় ফিরে অবনত শিরে
অবমানে আঁখি রক্ত ?
উৎসবশালা, জলে দীপমালা,
রবি চলে গেছে অস্তে ;—
কুতূহলীদলে কি বিধান-বলে
বাধা পায় দ্বারী হস্তে ?
ভঁহারা কি তবে অনাচারী হবে,
সমাজ হইতে ভিন্ন ?
পূজা দান ধ্যানে ছেলেখেলা জানে
এরা মনে মানে ঘৃণ্য ?

(উত্তর)

না না এরা সবে ফিরিছে নীরবে
দীন প্রতিবেশীবৃন্দে,
সাহেব-সমাজ আসিবেন আজ,
এরা এলে হবে নিন্দে !

(৩)

লোকটি কে ইনি যেন চিনি চিনি,

বাঙ্গালী মুখের ছন্দ,—

ধরণে ধরণে অতি অকারণে

ইংরাজিতরো গন্ধ !

কালিয়া-বরণ, অঙ্গে পরণ

কালো হাট্ কালোকুর্ভ,

বদি নিজ-দেশী কাছে আসে ঘোঁসি

কিছু যেন কড়ামূর্তি ।

দূত-পরা দেহ দেখা দিলে কেহ

অতিশয় লাগে লজ্জা,

বাঙ্গলা আলাপে বোবে সস্তাপে

জলে ওঠে হাড় মজ্জা ।

ঈহারা কি শেষ ছাড়িবেন দেশ ?

এঁরা কি ভারত-ঘেষ্টা ?

এঁদের কি তবে দলে দলে সবে

বিজাতি হবার চেষ্টা ?

(উত্তর)

এঁরা সবে বীর, এঁরা স্বদেশীর

প্রতিনিধি বলে গণ্য ;

কোটপরা কায় সঁপেছেন হায়

শুধু স্বজাতির জন্ত !

অমুরাগ ভরে ঘুচাবার তরে
 বঙ্গভূমির দুঃখ
 এ সভা মহতী ; এর সভাপতি
 সভ্যেরা দেশমুখ্য ।
 এরা দেশহিতে চাহিছে সঁপিতে
 আপন রক্ত মাংস,
 তবে এ সভাকে ছেড়ে কেন থাকে
 এ দেশের অধিকাংশ ?
 কেন দলে দলে দূরে যায় চলে,
 বুঝে না নিজের ইষ্ট,
 যদি কুতূহলে আসে সভাতলে,
 কেন বা নিদ্রাবিষ্ট ?
 তবে কি ইহারা নিজ-দেশছাড়া ?
 রুধিয়া রয়েছে কর্ণ
 দৈবের বশে পাছে কানে পশে
 শুভ কথা এক বর্ণ ?
 (উত্তর)
 না, না, এঁরা হন জন-সাধারণ,
 জানে দেশভাবামাত্র,
 স্বদেশ-সভায় বসিবারে হায়
 তাই অযোগ্য পাত্র !

(৪)

বেশ ভূষা ঠিক যেন আধুনিক,
 মুখ দাড়ি-সমাকীর্ণ,
 কিস্তি বচন অতি পুরাতন,
 ঘোরতর জরাজীর্ণ !
 উচ্চ আসনে বসি একমনে
 শূন্যে মেলিয়া দৃষ্টি
 তরুণ এ লোক লয়ে মনুশ্লোক
 করিছে বচন রুষ্টি !
 জলের সমান করিছে প্রমাণ,
 কিছু নহে উৎকৃষ্ট
 শালিবাহনের পূর্বে সনের
 পূর্বে বা নহে সৃষ্ট !
 শিশুকাল থেকে গেছেন কি পেকে
 নিখিল পুরাণ-তন্ত্রে ?
 বয়স নবীন করিছেন ক্ষীণ
 প্রাচীন বেদের মন্ত্রে ?
 আছেন কি তিনি লইয়া পাণিনি,
 পুঁথি লয়ে কীটদষ্ট ?
 বায়ুপুরাণের খুঁজি পাঠ-ফের
 আয়ু করিছেন নষ্ট ?

প্রাচীরের প্রতি গভীর আরতি
 বচন-রচনে সিদ্ধ,
 কহ ত ম'শায়, প্রাচীন ভাষায়
 কত দূর কৃতবিদ্য ?

(উত্তর)

ঋজুপাঠ দুটি নিয়েছেন লুটি,
 ছ' সর্গ রঘুবংশ,
 মাস্কমুলার হতে অধিকার
 শাস্ত্রের বাকি অংশ ।

পণ্ডিত ধীর মুণ্ডিত শির
 প্রাচীন শাস্ত্রে শিক্ষা,
 নবীন সভায় নব্য উপায়ে
 দিবেন ধর্ম দীক্ষা ।
 কহেন বোঝায়ে, কথাটি সোজা এ,
 হিন্দুধর্ম সত্য,
 মূলে আছে তার কেমিষ্ট্রি, আর
 শুধু পদার্থতত্ত্ব ।
 টিকিটা যে রাখা, ওতে আছে ঢাকা
 ম্যাগ্নেটিজ্‌ম্ শক্তি,
 তিলক রেখায় বৈদ্যুত ধায়
 তাই জেগে ওঠে তত্ত্ব ।

সন্ধ্যাটি হলে প্রাণপণ বলে
 বাজালে শঙ্খঘণ্টা
 মথিত বাতাসে তাড়িত প্রকাশে
 সচেতন হয় মন্টা ।
 এম্-এ ঝাঁকে ঝাঁক গুনিছে অবাক্
 অপরূপ বৃত্তান্ত—
 বিজ্ঞানভূষণ এমন ভীষণ
 বিজ্ঞানে হৃদ্যাস্ত !
 তবে ঠাকুরের পড়া আছে ঢের,—
 অন্ততঃ গ্যানো-খণ্ড,
 হেলম্‌হংস অতি বীভৎস
 করেছে লণ্ডভণ্ড !
 (উত্তর)
 কিছু না, কিছু না, নাই জানাশুনা
 বিজ্ঞান-কানাকোড়ি,
 লয়ে কল্পনা লম্বা রসনা
 করিছে দোড়াদোড়ি !

অশেষ ।

আবার আহ্বান ?

যত কিছু ছিল কাজ, সাক্ষ ত করেছি আজ
দীর্ঘ দিনমান ।

জাগারে মাধবীবন . চলে গেছে বহুকণ
প্রত্যাষ নবীন,
প্রথর পিপাসা হানি পুষ্পের শিশির টানি
গেছে মধ্যদিন ।

মাঠের পশ্চিম শেষে অপরাহ্ন স্নান হেসে
হল অবসান,
পরপারে উত্তরিতে পা দিয়েছি তরণীতে
আবার আহ্বান ?

নামে সন্ধ্যা তন্ময়ালসা, সোণার আঁচল খসা,
হাতে দীপশিখা,
দিনের কল্লোল পর টানি দিল ঝিল্লিস্বর
ঘন অবনিকা ।

ও পারের কালো কূলে কালী ঘনাইয়া তুলে
নিশার কালিমা,
গাঢ় সে তিমিরতলে চক্ষু কোথা ভুবে চলে
নাহি পায় সীমা ।

নয়ন-গল্লবপৰে স্বপ্ন জড়াইয়া ধৰে
 থেমে যান গান ;
 ক্লান্তি টানে অঙ্গ মম প্ৰিয়ৱ মিনতি সম ;
 এখনো আহ্বান ?

ৰে মোহিনী, ৰে নিষ্ঠুৰা ওৱে যুক্ত লোভাতুৱা
 কঠোৱ স্বামিনী,
 দিন মোৱ দিহু তোৱে শেষে নিতে চাম্ হৰে'
 আমাৰ যামিনী ?
 জগতে সবাৱি আছে সংসাৱ-সীমাৱ কাছে
 কোনখানে শেষ,
 কেন আসে মৰ্ম্মচ্ছেদি' সকল সমাপ্তি ভেদি'
 তোমাৱ আদেশ ?
 বিশ্বযোড়া অন্ধকাৱ সকলোৱি আপনাৱ
 একেলোৱ স্থান,
 কোথা হতে তাৱো মাৰে বিছাতোৱ মত বাজে
 তোমাৱ আহ্বান ?

দক্ষিণ সমুদ্ৰ পাৱে, তোমাৱ প্ৰাসাদ দ্বাৱে,
 হে জাগ্ৰত ৰাণী,
 বাজেনা কি সন্ধ্যাকালে শান্ত সূৱে ক্লান্ত তালে
 বৈৰাগ্যোৱ বাণী ?

সেথায় কি মুক বনে ঘুমায়েনা পাখীগণে
 অঁধার শাখায় ?
 তারাগুলি হস্যশিরে উঠেনা কি ধীরে ধীরে
 নিঃশব্দ পাখায় ?
 লতা বিতানের তলে বিছায়না পুষ্পদলে
 নিভৃত শয়ান ?
 হে অশ্রাস্ত শান্তিহীন, শেষ হয়ে গেল দিন,
 এখনো আহ্বান ?

রহিল রহিল তবে আমার আপন সবে,
 আমার নিরালা,
 মোর সন্ধ্যাদীপালোক, পথ-চাওয়া ছুটি চোখ,
 যত্নে গাঁথা মালা ।
 খেয়া তরী যাক্ বয়ে গৃহ-ফেরা লোক লগ্নে
 ও পারের গ্রামে,
 তৃতীয়ার ক্ষীণ শশি ধীরে পড়ে যাক্ খসি
 কুটীরের বামে !
 রাত্রি মোর, শান্তি মোর, রহিল স্বপ্নের ঘোর,
 স্তম্ভিত নির্বাণ,
 আবার চলিছে ফিরে বহি ক্লান্ত নত শিরে
 তোমার আহ্বান ।

বল তবে কি বাজাব, কুল দিয়ে কি সাজাব
 তব দ্বারে আজ,
 রক্ত দিয়ে কি লিখিব, প্রাণ দিয়ে কি শিখিব,
 ' কি করিব কাজ ?
 যদি অঁখি পড়ে ঢুলে, শ্লথ হস্ত যদি ভুলে
 পূর্ব নিপুণতা,
 বক্ষে নাহি পাই বল, চক্ষে যদি আসে জল,
 বেধে যায় কথা,
 চেয়ো নাকো ঘৃণাভরে, কোরো নাকো অনাদরে
 মোরে অপমান,
 মনে রেখো, হে নিদয়ে, মেনেছিলাম অসময়ে
 তোমার আহ্বান !

সেবক আমার মত রয়েছে সহস্র শত
 তোমার দ্বারে,
 তাহারা পেয়েছে ছুটি, ঘুমায় সকলে ছুটি
 পথের ছ'ধারে ।
 শুধু আমি তোরে সেবি বিদায় পাইনে' দেবী,
 ডাক ঋণে ঋণে ;
 বেছে নিলে আমারেই, ছরুহ সৌভাগ্য সেই
 বহি প্রাণপণে !

সেই গর্বে জাগি রব সারারাত্রি ঘারে তব
 অনিদ্র নয়নে,
 সেই গর্বে কণ্ঠে মম বহি বরমাণ্যসম
 তোমার আহ্বান !

হবে, হবে, হবে জয়, হে দেবী করিনে ভয়,
 হব আমি জয়ী !
 তোমার আহ্বানবাণী সফল করিব রাণী,
 হে মহিমাময়ী !
 কাঁপিবেনা ক্লান্তকর, ভাঙ্গিবেনা কণ্ঠস্বর,
 টুটিবেনা বীণা,
 নবীন প্রভাত লাগি দীর্ঘ রাত্রি রব জাগি,
 দীপ নিবিবে না !
 কর্মভার নবপ্রাতে নব সেবকের হাতে
 করি যাব দান,
 মোর শেষ কণ্ঠস্বরে যাইব ঘোষণা করে
 তোমার আহ্বান !

বিদায় কাল ।

ক্ষমা কর, ধৈর্য্য ধর,
হউক সুন্দরতর
বিদায়ের ক্ষণ !

মৃত্যু নয়, ধ্বংস নয়,
নহে বিচ্ছেদের ভয়,
শুধু সমাপন ।

শুধু সুখ হতে স্মৃতি,
শুধু ব্যথা হতে গীতি,
তরী হতে তীর,
খেলা হতে খেলাশ্রান্তি,
বাসনা হইতে শান্তি,
নভ হতে নীড় ।

দিনান্তের নম্র কর
পড়ুক মাথার পর,
অঁাখিপরে ঘুম,
হৃদয়ের পত্রপুটে
গোপনে উঠুক ফুটে
নিশার কুসুম !

আরতির শঙ্খরবে
 নামিয়া আসুক্ তবে
 পূর্ণ পরিণাম,
 হাসি নয় অশ্রু নয়
 উদার বৈরাগ্যময়
 বিশাল বিশ্রাম ।

প্রভাতে যে পাখী সবে
 গেয়েছিল কলরবে,
 থামুক্ এখন !

প্রভাতে যে ফুলগুলি
 জেগেছিল মুখ তুলি,
 মুছুক্ নয়ন !

প্রভাতে যে বায়ুদল
 ফিরেছিল সচঞ্চল
 যাক্ থেমে যাক্ !

নীরবে উদয় হোক্
 অসীম নক্ষত্র-লোক
 পরম নির্ঝাক্ !

বর্ষ শেষ ।

৮৭

হে মহানন্দর শেষ !
হে বিদায় অনিমেঘ !
হে সৌম্য বিষাদ !
অগ্নেক দাঁড়াও স্থির
মুছায়ে নয়ন-নীর
কর আশীর্বাদ !
অগ্নেক দাঁড়াও স্থির !
পদতলে নমি শির
তব যাত্রাপথে,
নিদ্রাম্প প্রদীপ ধরি
নিঃশব্দে আরতি করি
নিস্তরু জগতে !

১৩০৫ ।

বর্ষ শেষ ।

ঈশানের পূজ্যমেঘ অন্ধবেগে ধেয়ে চলে' আসে
বাধাবদ্ধহারা
গ্রামান্তের বেণুকুঞ্জে নীলাঞ্জন ছায়া সঞ্চারিয়া,
হানি' দীর্ঘবারা ।

। ১৩০৫ শালে ৩০শে চৈত্র ঋতুর দিনে রচিত ।

বর্ষ হয়ে আসে শেষ, দিন হয়ে এল সমাপন,
 চৈত্র অবসান ;
 গাহিতে চাহিছে হিয়া পুরাতন ক্লাস্ত বরষের
 সর্বশেষ গান ।

ধূসর-পাংশুল মাঠ, ধেনুগণ ধায় উর্দ্ধমুখে,
 ছুটে চলে চাষী,
 তুরিতে নামায় পাল নদীপথে ত্রস্ত তরী যত
 তীরপ্রান্তে আসি ।
 পশ্চিমে বিচ্ছিন্ন মেঘে সায়াহ্নের পিঙ্গল আভাস
 রাঙাইছে আঁধি,—
 বিদ্যুৎ-বিদীর্ণ শূন্যে ঝাঁকে ঝাঁকে উড়ে চলে যায়
 উৎকণ্ঠিত পাখী ।

বীণাতন্ত্রে হান হান খরতর ঝঙ্কার ঝঙ্কনা,
 তোল উচ্ছ্বস !
 হৃদয় নির্দয়ভাবে ঝঝরিয়া ঝরিয়া পড়ুক
 প্রবল প্রচুর !
 ধাও গান প্রাণভরা ঝড়ের মতন উর্দ্ধবেগে
 অনন্ত আকাশে !
 উড়ে যাক্ দূরে যাক্ বিবর্ণ বিশীর্ণ জীর্ণ পাতা
 বিপুল নিঃশ্বাসে !

আনন্দে আতঙ্কে মিশি, ক্রন্দনে উল্লাসে গরজিয়া
 মত্ত হাহারবে
 ঝঞ্ঝার মঞ্জীর বাঁধি উন্মাদিনী কালবৈশাখীর
 নৃত্য হোক্ তবে !
 ছন্দে ছন্দে পদে পদে অঞ্চলের আবর্ত আঘাতে
 উড়ে হোক্ ক্ষয়
 ধূলিসম ভৃগুসম পুরাতন বৎসরের যত
 নিষ্ফল সঞ্চয় !

মুক্ত করি দিহু দ্বার,—আকাশের যত বৃষ্টিঝড়
 আয় মোর বুকে,
 শব্দের মতন তুলি একটি ফুৎকার হানি দাও
 হৃদয়ের মুখে !
 বিজয়-গর্জন-স্বনে অদ্রভেদ করিয়া উঠুক
 মঙ্গল নির্ঘোষ,
 জাগায়ে জাগ্রত চিত্তে মুনিসম উলঙ্গ নিশ্চল
 কঠিন সন্তোষ !

সে পূর্ণ উদাত্তধ্বনি বেদগাথা সামমন্ত্রসম
 সরল গম্ভীর
 সমস্ত অন্তর হতে মুহূর্তে অখণ্ডমূর্তি ধরি
 হউক্ বাহির !

নাহি তাহে ছুঃখ স্খুঃ পুরাতন তাপ-পরিতাপ
 কম্প লজ্জা ভয়,
 শুধু তাহা সত্ত্বমাত ঋজু শুভ্র মুক্ত জীবনের
 জয়ধ্বনিময় ।

হে নূতন, এস তুমি সম্পূর্ণ গগন পূর্ণ করি
 পুঞ্জ পুঞ্জ রূপে,
 ব্যাপ্ত করি, লুপ্ত করি, স্তরে স্তরে স্তবকে স্তবকে
 ঘন ঘোর স্তূপে !
 কোথা হতে আচম্বিতে মুহূর্ত্তেকে দিক্ দিগন্তর
 করি অন্তরাল
 স্নিগ্ধ কৃষ্ণ ভয়ঙ্কর তোমার সঘন অন্ধকারে
 রহ ধ্বংসকাল !

তোমার ইঙ্গিত যেন ঘন গুচ্ছ জ্বলন্ত তলে
 বিচ্যুতে প্রকাশে,—
 তোমার সঙ্গীত যেন গগনের শত ছিদ্ৰ মুখে
 বায়ুগর্জে আসে,—
 তোমার বর্ষণ যেন পিপাসারে তীব্র তীক্ষ্ণবেগে
 বিদ্ধ করি হানে,
 তোমার প্রশান্তি যেন স্নপ্ত শ্রাম ব্যাপ্ত স্নগমীর
 স্তব্ধ রাত্রি আনে !

এবার আসনি তুমি বসন্তের আবেশ-হিল্লোলে
 পুষ্পদল চুমি',
 এবার আসনি তুমি মন্দিরিত কুজনে গুঞ্জে,—
 ধন্ত ধন্ত-তুমি !
 রথচক্র ঘর্ষরিয়া এসেছ বিজয়ী রাজসম
 গর্ভিত নির্ভয়,—
 বজ্রমস্ত্রে কি ঘোষিলে বুঝিলাম, নাহি বুঝিলাম,—
 জয় তব জয় !

হে হৃদম, হে নিশ্চিত, হে নূতন নিষ্ঠুর নূতন,
 সহজ প্রবল !
 জীর্ণ পুষ্পদল যথা ধ্বংস ভ্রংশ করি চতুর্দিকে
 বাহিরায় ফল—
 পুরাতন-পর্ণপুট দীর্ণ করি বিকীর্ণ করিয়া
 অপূর্ব আকারে
 তেমনি সবলে তুমি পরিপূর্ণ হয়েছ প্রকাশ—
 প্রণমি তোমায়ে !

তোমায়ে প্রণমি আমি, হে ভীষণ, সুস্নিগ্ধ শ্রামল,
 অক্রান্ত অমান !
 সন্তোজাত মহাবীর, কি এনেছ করিয়া বহন
 কিছু নাহি জান !

উড়েছে তোমার ধ্বজা মেঘরন্ধু চ্যুত তপনের
 জলদর্চি-রেখা ;
 করঘোড়ে চেয়ে আছি উর্দ্ধমুখে, পড়িতে জানি না
 কি তাহাতে লেখা ।

হে কুমার, হাস্যমুখে তোমার ধমুকে দাও টান
 ঝনন রনন,
 বক্ষের পঙ্কর ভেদি' অন্তরেতে হউক্ কল্পিত
 স্তম্ভিত স্বনন !
 হে কিশোর, তুলে লও তোমার উদার জয়ভেরী,
 করহ আহ্বান !
 আমরা দাঁড়াব উঠি, আমরা ছুটিয়া বাহিরিব,
 অর্পিব পরাগ !

চাব না পশ্চাতে মোরা, মানিব না বন্ধন ক্রন্দন,
 হেরিব না দিক্,
 গণিব না দিনকণ, করিব না বিতর্ক বিচাব,
 উদ্দাম পথিক !
 মুহূর্তে করিব পান মৃত্যুর ফেনিল উন্নততা
 উপকণ্ঠ ভরি,—
 থিন্ন শীর্ণ জীবনের শত লক্ষ ধিকার লাজনা
 উৎসর্জন করি !

শুধু দিনযাপনের শুধু প্রাণধারণের মানি,
 সরমের ডালি,
 নিশি নিশি রুদ্ধ ঘরে ক্ষুদ্রশিখা স্তিমিত দীপের
 ধূমাক্তিত কালী,
 লাভ ক্ষতি টানাটানি, অতি সূক্ষ্ম ভগ্ন অংশ ভাগ,
 কলহ সংশয়,
 সহে না সহে না আর জাবনেরে খণ্ড খণ্ড করি
 দণ্ডে নণ্ডে ক্ষয় !

যে পথে অনন্ত লোক চলিয়াছে ভীষণ নীরবে
 সে পথপ্রান্তের
 এক পার্শ্বে রাখ মোরে, নিরখিব বিরাট স্বরূপ
 যুগ-যুগান্তের !
 শূন্যসম অকস্মাৎ ছিন্ন করে উর্দ্ধে লয়ে যাও
 পঙ্ককুণ্ড হতে,
 মহান্ মৃত্যুর সাথে মুখামুখি করে দাও মোরে
 বজ্রের আলোতে !

তার পরে ফেলে দাও, চূর্ণ কর, বাহা ইচ্ছা তব,
 ভগ্ন কর পাখা !
 যেখানে নিক্ষেপ কর হুতপত্র, চ্যুত পুষ্পদল,
 ছিন্ন ভিন্ন শাখা,

ক্ষণিক খেলনা তব, দয়াহীন তব দস্যুতার
 লুণ্ঠনাবশেষ,
 সেথা মোরে ফেলে দিয়ে অনন্ত-তমিস্র সেই
 বিস্মৃতির দেশ !

নবাকুর ইক্ষুবনে এখনো ঝরিছে বৃষ্টিধারা
 বিশ্রাম বিহীন ;
 মেঘের অন্তর পথে অন্ধকার হতে অন্ধকারে
 চলে গেল দিন ।

শান্ত ঝড়ে, ঝিল্লিরবে, ধরণীর মিশ্র গম্বোচ্ছ্বাসে,
 মৃত্ত বাতায়নে
 বৎসরের শেষ গান সাঙ্গ করি দিহু অঞ্জলিয়া
 নিশীথ গগনে !

১৩০৫ ।

ঝড়ের দিনে ।

আজি এই আকুল আশ্বিনে,
 মেঘে-ঢাকা ছরস্তু ছুঁদিনে,
 হেমন্ত ধানের ক্ষেতে বাতাস উঠেছে মেতে,
 কেমনে চলিবে পথ চিনে ?
 আজি এই ছরস্তু ছুঁদিনে !

দেখিছ না ওগো সাহসিকা
 কিকিমিকি বিদ্যুতের শিখা !
 মনে ভেবে দেখ তবে এ ঝড়ে কি বাঁধা রবে
 কবরীর শেফালি-মালিকা ?
 ভেবে দেখ ওগো সাহসিকা !
 আজিকার এমন ঝঙ্কার
 নুপুর বাঁধে কি কেহ পায় ?
 যদি আজি বৃষ্টিজল ধুয়ে দেয় নীলাঞ্চল
 গ্রামপথে যাবে কি লজ্জায়
 আজিকার এমন ঝঙ্কার ?
 হে উতলা শোন কথা শোন !
 ছয়ার কি খোলা আছে কোনো ?
 এ বাকা পথের শেষে মাঠ যেথা মেঘে মেঘে
 বসে' কেহ আছে কি এখনো
 এ ছুর্যোগে, শোন ওগো শোন !
 আজ যদি দীপ জ্বালে দ্বারে
 নিবে কি যাবে না বারে বারে ?
 আজ যদি বাজে বাঁশি গান কি যাবে না ভাসি'
 আশ্বিনের অসীম আঁধারে
 ঝড়ের ঝাপটে বারে বারে ?

মেঘ যদি ডাকে গুরু গুরু,
 নৃত্য মাঝে কেঁপে ওঠে উক,
 কাহারে করিবে হৃদয় পূর দিবে দোষ
 বন্ধ যদি করে হৃদয়
 মেঘে ডেকে ওঠে গুরু গুরু

যাবে যদি,— মনে ছিল না কি,
 আমারে নিলে না কেন ডাকি ?
 আমি ত পথেরি ধারে বসিয়া ঘবের দ্বারে
 আনমনে ছিলাম একাকী
 আমারে নিলে না কেন ডাকি ?

কখন প্রহর গেছে বাজি,
 কোন কাজ নাহি ছিল আজি ;
 ঘরে আসে নাই কেহ, সারা দিন শূন্য গেহ,
 বিলাপ করেছে তকরাজি ।
 কোন কাজ নাহি ছিল আজি !

যত বেগে গরজিত ঝড়,
 যত মেঘে ছাইত অশ্রু,
 রাত্রে অন্ধকারে যত পথ অফুরান্ হত
 আমি নাহি করিতাম ডর—
 যত বেগে গরজিত ঝড় ।

বিদ্যুতের চমকানি-কালে
 এ বক্ষ নাচিত তালে তালে ;
 উত্তরী উড়িত মম উন্মুখ পাখার সম ;
 মিশে যেতে আকাশে পাতালে
 বিদ্যুতের চমকানি কালে ।

তোমায় আমায় একত্তর
 সে যাত্রা হইত ভয়ঙ্কর ।
 তোমার নূপুর আজি প্রলয়ে উঠিত বাজি,
 বিজুলী হানিত অঁথিপর,
 যাত্রা হত মত্ত ভয়ঙ্কর !

কেন আজি যাও একাকিনী ?
 কেন পায়ে বেঁধেছ কিঙ্কিনী ?
 এ ছদ্ম্বিনে কি কারণে পড়িল তোমার মনে
 বসন্তের বিস্মৃত কাহিনী ?
 কোথা আজি যাও একাকিনী ?

১৩০৬ ।

অসময় ।

হায়েছে কি তবে সিংহ-ছয়ার বন্ধ রে ?

এখনো সময় আছে কি, সময় আছে কি ?

দূরে কলরব ধ্বনিছে মন্দ মন্দ রে,

ফুরাল কি পথ ? এসেছি পুরীর কাছে কি ?

মনে হয় সেই স্মৃতির মধুর গন্ধ রে

রহি রহি যেন ভাসিয়া আসিছে বাতাসে ।

বহু সংশয়ে বহু বিলম্ব করেছি,

এখন বক্ষ্যা সন্ধ্যা আসিল আকাশে !

ওই কি প্রদীপ দেখা যায় পুরমন্দিরে ?

ও বে ছুটি তারা দূর পশ্চিম গগনে ।

ও কি শিঞ্জিত ধ্বনিছে কনক মঞ্জীরে ?

ঝিল্লির রব বাজে বনপথে সঘনে ।

মরীচিকা-লেখা দিগন্তপথ রঞ্জি' বে

সারাদিন আজি ছলনা করেছে হতাশে ।

বহু সংশয়ে বহু বিলম্ব করেছি,

এখন বক্ষ্যা সন্ধ্যা আসিল আকাশে ।

এত দিনে সেথা বন-বনান্ত নন্দিয়া

নব-বসন্তে এসেছে নবীন ভূপতি !

তরুণ আশার সোনার প্রতিমা বন্দিয়া

নব আনন্দে ফিরিছে যুবক-যুবতী ।

বীণার তন্ত্রী আকুল ছন্দে ক্রন্দিয়া
ডাকিছে সবারে আছে যারা দূর প্রবাসে ।
বহু সংশয়ে বহু বিলম্ব করেছি,
এখন বন্ধ্য সন্ধ্যা আসিল আকাশে ।

আজিকে সবাই সাজিয়াছে ফুলচন্দনে,
মুক্ত আকাশে যাপিবে জ্যোৎস্না-যামিনী ।
দলে দলে চলে বাঁধাবাঁধি বাহু-বন্ধনে,
ধ্বনিছে শূন্যে জয়-সঙ্গীত-রাগিণী ।
নূতন পতাকা নূতন প্রাসাদ-প্রাঙ্গণে
দক্ষিণবায়ু উড়িছে বিজয় বিলাসে।
বহু সংশয়ে বহু বিলম্ব করেছি
এখন বন্ধ্য সন্ধ্যা আসিল আকাশে !

'সারা নিশি ধরে রথা করিলাম মন্ত্ৰণা,
শরৎ-প্রভাতে কাটিল শূন্যে চাহিয়া,
বিদায়ের কালে দিতে গেছু কারে সাঙ্ঘিনা,
যাত্রীরা হোথা গেল থেয়াতরী বাহিয়া'!
আপন্মারে শুধু বৃথা করিলাম বঞ্চনা,
জীবন-আহুতি দিলাম কি আশা-হতাশে !
বহু সংশয়ে বহু বিলম্ব করেছি
এখন বন্ধ্য সন্ধ্যা আসিল আকাশে !

প্রভাতে আমায় ডেকেছিল সবে ইঙ্গিতে,
 বহুজনমাঝে লয়েছিল মোরে বাছিয়া,
 যবে রাজপথ ধ্বনিয়া উঠিল সঙ্গীতে
 তখনো বারেক উঠেছিল প্রাণ নাচিয়া।
 এখন কি আর পারিব প্রাচীর লজ্জিতে,
 দাঁড়ায়ে বাহিরে ডাকিব কাহারে স্বধা সে !
 বহু সংশয়ে বহু বিলম্ব করেছি
 এখন বক্ষ্য্য সন্ধ্যা আসিল আকাশে !

তবু একদিন এই আশাহীন পন্থ রে
 অতি দূরে দূরে ঘুরে ঘুরে শেষে ফুরাবে,
 দীর্ঘ ভ্রমণ একদিন হবে অন্ত রে,
 শান্তি সন্নিহিত শ্রান্ত শরীর জুড়াবে ।
 ছয়ার-প্রান্তে দাঁড়ায়ে বাহির প্রান্তরে
 ভেঁষী বাজাইব মোর প্রাণপণ প্রয়াসে ।
 বহু সংশয়ে বহু বিলম্ব করেছি
 এখন বক্ষ্য্য সন্ধ্যা আসিছে আকাশে !

বসন্ত ।

অষুভ বৎসর আগে, হে বসন্ত, প্রথম ফাল্গুনে,
 মত্ত কুতূহলী,
 প্রথম যে দিন খুলি নন্দনের দক্ষিণ ছয়ার
 মর্ত্যে এলে চলি,—
 অকস্মাৎ দাঁড়াইলে মানবের কুটীর প্রাঙ্গনে
 পীতাম্বর পরি,
 উতলা উত্তরী হাতে উড়াইয়া উন্মাদ পবনে
 মন্দার-মঞ্জরী,—
 দলে দলে নর-নারী ছুটে এল গৃহদ্বার খুলি'
 লয়ে বীণা বেণু
 মতিয়া পাগল নৃত্যে হাসিয়া করিল হানাহানি
 ছুঁড়ি পুষ্পরেণু ।

সখা, সেই অতি দূর সজোজাত আদি মধুনাগে
 তরুণ ধরায়
 এনেছিলে যে কুসুম ডুবাইয়া তপ্ত কিরণের
 স্বর্ণ মদিরায়,
 সেই পুরাতন সেই চিরন্তন অনন্ত প্রবীন
 নব পুষ্পরাজি

বর্ষে বর্ষে আনিয়াছ, তাই লয়ে আজো গুনকীর
সাজাইলে সাজি ।

তাই সেই পুষ্পে লিখা জগতের প্রাচীন দিনের
বিস্মৃত বারতা,
তাই তার গন্ধে ভাসে ক্লান্ত লুপ্ত লোক-লোকান্তের
কান্ত মধুরতা ।

তাই আজি প্রস্ফুটিত নিবিড় নিকুঞ্জবন হতে
উঠিছে উচ্ছ্বাসি

লক্ষ দিন যামিনীর যৌবনের বিচিত্র বেদনা,
অশ্রু, গান, হাসি ।

যে মালা গেঁথেছি আজি তোমাতে সঁপিতে উপহার,
তারি দলে দলে

নামহারা নাগিকার পুরাতন আকাজকা-কাহিনী
আঁকা অশ্রুজলে ।

সম্বন্ধ-সেচন-সিক্ত নবোন্মুক্ত এই গোলাপের
রক্ত পত্রপুট

কল্পিত কুণ্ঠিত কত অসংখ্য চুধন-ইতিহাস
রহিয়াছে ফুটে !

আমার বসন্ত রাতে চারি চক্ষে জেগে উঠেছিল
যে কয়টি কথা,

তোমার কুসুমগুলি, হে বসন্ত, সে গুপ্ত সংবাদ,
 নিয়ে গেল কোথা ?
 সে চম্পক, সে বকুল, সে চঞ্চল চকিত চার্মেল
 স্নিত গুহ্রমুখী,
 তরুণী রজনীগন্ধা আগ্রহে উৎসুক উন্নমিতা,
 একান্ত কোতুকী,
 কয়েক বসন্তে তারা আমার বোবন-কাব্যগাথা
 লয়েছিল পড়ি' ;
 কণ্ঠে কণ্ঠে থাকি তারা শুনেছিল ছুটি বক্ষোমাঝে
 বাসনা বাঁশরী ।
 ব্যর্থ জীবনের সেই কয়খানি পরন অধ্যায়,
 ওগো মধুমাস,
 তোমার কুসুমগন্ধে বর্ষে বর্ষে শূন্যে জলেস্থলে
 হইবে প্রকাশ ।
 বকুলে চম্পকে তারা গাঁথা হয়ে নিত্য যাবে চলি
 যুগে যুগান্তরে,
 বসন্তে বসন্তে তারা কুঞ্জে কুঞ্জে উঠিবে আকুলি
 কুল কলসরে ।
 অমর বেদনা মোর, হে বসন্ত, রহি গেল তব
 মর্ম্মর নিঃশ্বাসে,
 উত্তপ্ত বোবনমোহ রক্তরৌদ্রে রহিল রঞ্জিত
 চৈত্র সন্ধ্যাকাশে ।

ভগ্ন মন্দির ।

ভাঙা দেউলের দেবতা !
 তব বন্দনা রচিতে, ছিন্না
 বীণার তন্ত্রী বিরতা !
 সন্ধ্যা-গগনে ঘোষণা শঙ্খ
 তোমার আরতি-বারতা !
 তব মন্দির স্থির-গম্ভীর,
 ভাঙা দেউলের দেবতা !

তব জনহীন ভবনে
 থেকে থেকে আসে ব্যাকুল গন্ধ
 নব-বসন্ত-পবনে !
 যে ফুলে রচেনি পূজার অর্ঘ্য,
 রাখেনি ও রাঙা চরণে,
 সে ফুল ফোটায় আসে সমাচার
 জনহীন ভাঙা ভবনে ।

পূজাহীন তব পূজারী
 কোথা সারাদিন ফিরে উদাসীন
 কার প্রসাদের ভিখারী !

গোধূলী বেলায় বনের ছায়ায়
চির-উপবাস-ভুখারী
ভাঙা মন্দিরে আসে ফিরে ফিরে
পূজাহীন তব পূজারী !

ভাঙা দেউলের দেবতা !
কত উৎসব হইল নীরব
কত পূজানিশা বিগত !
কত বিজয়ায় নবীন প্রতিমা
কত যায় কত কব তা',
শুধু চিরদিন থাকে সেবাহীন
ভাঙা দেউলের দেবতা !

বৈশাখ ।

হে ভৈরব হে রুদ্র বৈশাখ !
ধূলায় ধূসর রুক্ষ উড্ডীন পিঙ্গল জটাজাল,
তপঃক্লিষ্ট তপ্ত তনু, মুখে তুলি পিনাক করাল
কারে দাও ডাক !
হে ভৈরব, হে রুদ্র বৈশাখ !

ছায়ামূর্তি যত অল্পচর
 দগ্ধতাম্র দিগন্তের কোন্ ছিদ্র হতে ছুটে আসে !
 কি ভীষ্ম অদৃশ্য নৃত্যে মাতি উঠে মধ্যাহ্ন আকাশে
 নিঃশব্দ প্রথর
 ছায়ামূর্তি তব অল্পচর !

মত্তশ্রমে ঋষিছে হতাশ !
 রহি রহি দহি দহি উগ্রবেগে উঠিছে ঘুরিয়া,
 আবর্তিয়া ভূণপর্ণ, ঘূর্ণ্যচ্ছন্দে শূন্যে আলোড়িয়া
 চূর্ণ বেগু-রাশ
 মত্তশ্রমে ঋষিছে হতাশ !

দীপ্তচক্ষু হে শীর্ণ সন্যাসী !
 পদ্মাসনে বস আসি রক্তনেত্র তুলিয়া ললাটে,
 শুষ্কজল নদীতীরে শস্যশূন্য ভূষাদীর্ণ মাঠে
 উদাসী প্রবাসী,
 দীপ্তচক্ষু হে শীর্ণ সন্যাসী !

জলিতেছে সম্মুখে তোমার
 লোলুপ চিতাগ্নিশিখা, লেহি লেহি বিরাট অম্বর

নিখিলের পরিত্যক্ত মৃতস্তূপ বিগত বৎসর
করি ভস্মদার
চিতা জলে সম্মুখে তোমার !

হে বৈরাগী কর শান্তিপাঠ !
উদার উদাস কণ্ঠ যাক্ ছুটে দক্ষিণে ও বামে,
যাক্ নদী পার হই, যাক্ চলি গ্রাম হতে গ্রামে,
পূর্ণ করি ষাঠ !
হে বৈরাগী কর শান্তিপাঠ !

সকরুণ তব মন্ত্রসাথে
মর্মাভেদী যত দুঃখ বিস্তারিয়া যাক্ বিশ্বপরে,
ক্লান্ত কপোতের কণ্ঠে, ক্ষীণ জাহ্নবীর শ্রান্তস্বরে,
অস্থখ ছায়াতে
সকরুণ তব মন্ত্রসাথে !

দুঃখ স্তূথ আশা ও নৈরাশ
তোমার ফুৎকার-স্কন্ধ ধ্বংসম উড়ুক্ গগনে,
ভরে' দিক্ নিকুঞ্জের স্থলিত ফুলের গন্ধসনে
আকুল আকাশ !
দুঃখ স্তূথ আশা ও নৈরাশ !

তোমার গেরুয়া বস্ত্রাঞ্চল

দাও পাতি নতস্তলে,—বিশাল বৈরাগ্যে আবরিষা

জরা মৃত্যু ক্ষুধা তৃষ্ণা, লক্ষ কোটি নরনারী-হিয়া

চিস্তায় বিকল !

দাও পাতি গেরুয়া অঞ্চল !

ছাড় ডাক, হে রুদ্ধ বৈশাখ !

ভাঙিয়া মধ্যাহ্ন তন্দ্রা জাগি উঠি বাহিরিব দ্বারে,

চেয়ে রব প্রাণীশূন্য দক্ষতৃণ দিগন্তের পারে

নিস্তরু নির্ঝাক !

হে ভৈবক, হে রুদ্ধ বৈশাখ !

১৩০৬ ।

রাত্রি ।

মোরে কর সভাকবি ধানমৌন তোমার সভায়

হে শরীরী, হে অবগুপ্তিতা !

তোমার আকাশ জুড়ি যুগে যুগে জপিছে যাহারা

বিরচিব তাহাদের গীতা !

তোমার তিমিরতলে যে বিপুল নিঃশব্দ উদ্যোগ

ভ্রমিতেছে জগতে জগতে

আমারে তুলিয়া লও সেই তার ধ্বজচক্রহীন

নীরবধর মহারথে !

তুমি একেশ্বরী রাণী বিশ্বের অন্তর-অন্তঃপুরে
 স্নগম্ভীরা হে শ্যামাসুন্দরী !
 দিবসের ক্ষয়ক্ষীণ বিরাট ভাণ্ডারে প্রবেশিয়া
 নীরবে রাখিছ ভাণ্ড ভরি !
 নক্ষত্র-রতন-দীপ্ত নীলকান্ত স্তম্ভ-সিংহাসনে
 তোমার মহান্ জাগরণ !
 আমারে জাগায়ে রাখ সে নিস্তক জাগরণ তলে
 নির্নিমেষ পূর্ণ সচেতন !

কত নিদাহীন চক্ষু যুগে যুগে তোমার অর্ধধারে
 খুঁজেছিল প্রেমের উত্তর !
 তোমার নির্ঝাক মুখে একদৃষ্টে চেয়েছিল বসি
 কত ভক্ত জুড়ি ছই কর !
 দিবস মুদিলে চক্ষু, ধীরপদে কোতূহলী দল
 অঙ্গনে পশিয়া সাবধানে
 তব দীপহীন কক্ষে সুখ হুঃখ জন্মমরণের
 ফিরিয়াছে গোপন সন্ধানেন !

স্তম্ভিত তমিস্রপুঞ্জ কস্পিত করিয়া অকস্মাৎ
 অর্ধরাত্রে উঠেছে উচ্ছ্বাসি
 সদ্যক্ষুট ব্রহ্মমন্ত্র আনন্দিত ঋষিকর্প হতে
 আন্দোলিয়া ঘন তন্দ্রাশি !

পীড়িত ভুবন লাগি মহাযোগী করুণা-কাতর,
 চকিতে বিদ্যুৎ-রেখাবৎ
 তোমার নিখিল-লুপ্ত অন্ধকারে দাঁড়িয়ে একাকী
 দেখেছে বিশ্বের মুক্তিপথ ।

জগতের সেইসব যামিনীর জাগরুকদল
 সঙ্গীহীন তব সভাসদ
 কে কোথা বসিয়া আছে আজি রাত্রে ধরণীর মাঝে
 গণিতেছে গোপন সম্পদ !
 কেহ কারে নাহি জানে, আপনার স্বতন্ত্র আসনে
 আসীন স্বাধীন স্তব্ধছবি ;
 হে শরীরী সেই তব বাক্যহীন জাগ্রত সভায়
 মোরে করি দাও সভাকবি ।

অনবচ্ছিন্ন আমি ।

১১১

অনবচ্ছিন্ন আমি ।

আজি মগ্ন হয়েছিহু ব্রহ্মাণ্ড মাঝারে,
যখন মেলিহু আঁখি, হেরিহু আমারে !
ধরণীর বস্ত্রাঞ্চল দেখিলাম তুলি,
আমার নাড়ীর কম্পে কম্পমান ধূলি !
অনন্ত আকাশ-তলে দেখিলাম নামি,
আলোক-দোলায় বসি ছলিতেছি আমি !
আজি গিয়েছিহু চলি মৃত্যু পরপারে
সেথা বৃদ্ধ পুরাতন হেরিহু আমারে !
অবিচ্ছিন্ন আপনারে নিরখি ভুবনে
শিহরি উঠিহু কাঁপি আপনার মনে ।
জলে স্থলে শূন্যে আমি যতদূরে চাই
আপনারে হারাবার নাই কোন ঠাই !
জলহল দ্রু করি ব্রহ্ম অন্তর্ধামী,
হেরিলাম তাঁর মাঝে স্পন্দমান আমি !

১৩০৬ ।

জন্মদিনের গান।

বেহাগ। চৌতাল।

ভয় হতে তব অভয়-মাঝারে

নূতন জনম দাও হে!

দীনতা হইতে অক্ষয় ধনে,

সংশয় হতে সত্য-সদনে,

জড়তা হইতে নবীন জীবনে

নূতন জনম দাও হে!

আমার ইচ্ছা হইতে, হে প্রভু,

তোমার ইচ্ছা মাঝে,

আমার স্বার্থ হইতে, হে প্রভু,

তব মঙ্গল কাজে,

অনেক হইতে একের ভোরে,

সুখ দুখ হতে শান্তি-কোড়ে,

আমা হতে নাথ তোমাতে মোরে

নূতন জনম দাও হে!



পূর্ণকাম ।

কীৰ্ত্তনের সুর ।

সংসাবে মন দিয়েছিহু, তুমি
 আপনি সে মন নিয়েছ !
 স্তম্ভ বলে জুথ চেয়েছিহু, তুমি
 ছুথ বলে স্তম্ভ দিয়েছ !
 হৃদয় বাহার শতখানে ছিল
 শত স্বার্থের সাধনে,
 তাহারে কেমনে কুড়ায়ে আনিলে,
 বাধিলে ভক্তি বাধনে ।
 স্তম্ভ স্তম্ভ কবে দ্বারে দ্বারে মোরে
 কতদিকে কত খোঁজালে !
 তুমি যে আমার কত আপনার
 এবার সে কথা বোঝালে !
 ককথা তোমার কোন্ পথ দিয়ে
 কোথা নিয়ে যায় কাহানে !
 সহসা দেখিহু নয়ন মেলিয়ে
 এনেছ তোমারি ছুবারে !

পরিণাম ।

ভৈরবী ঝাঁপতাল ।

জানি হে যবে প্রভাত হবে, তোমার রূপা-তরলী
 লইবে মোরে ভব-সাগর-কিনারে !
 করি না ভয়, তোমারি জয় গাহিয়া যাব চলিয়া,
 দাঁড়াব আমি তব অমৃত-দুয়ারে !
 জানিহে তুমি যুগে যুগে তোমার বাহু বেরিয়া
 রেখেছ মোরে তব অসীম ভুবনে ;
 জনম মোরে দিয়েছ তুমি আলোক হতে আলোকে,
 জীবন হতে নিয়েছ নব জীবনে !
 জানি হে নাথ পুণ্যপাপে হৃদয় মোর সতত
 শয়ান আছে তব নয়ান-সমুখে ;
 আমার হাতে তোমার হাত রয়েছে দিন রজনী
 সকল পথে বিপথে স্মৃতে অস্মৃতে !
 জানি হে জানি জীবন মম বিফল কভু হবে না,
 দিবেনা ফেলি বিনাশ-ভয়-পাথারে !
 এমন দিন আসিবে যবে করুণাভরে আপনি
 ফুলের মত তুলিয়া লবে তাহারে ।